

IHUAQNIGHAKKUT PARNAIYAIYUT

Ilihaqtut Maliktaghait

ATANIQTUQTUINIQMUT ILIHIMAYAGHAT:

Ayuiqhaiyut Ilihimaghainik

Makpiraanguyut Miiyanut

Katimayinullu

Nunavunmi Nunallaarnit Ilihaiyit Katimayiit



NAUNAITKUTAT MAKPIQQANUT

QANUQ ATUQTAUYUGHAT HAPKUA MALIKTAGHAT 1

ILITTUQHITIT 2

ILANGA I - HUNAUYUQ IHUAQNIGHAKKUT PARNAIYAINIQ? 2

Ihuaqnighakkut Parnaiyainiqmut Ilihimaghat 2

Hunauyuq Ihuaqnighakkut Parnaiyainiq? 2

Hitamauyut Avighimaniit Parnaiyainiqmut 5

Ikeyuutit taapkununnga Nunallaarnit Ihuaqnighakkut Parnaiyautit 6

Ihuaqnighakkut Parnaiyainiqmut Ilihimaghat: Ingmingnut-Qauyihautit 8

ILANGA II - QANUQ HANAYAAMIK IHUAQNIGHAKKUT PARNAIYAUTINIK..... 9

Kaivitaqtut Ihuaqnighakkut Parnaiyautinut Havauhiit 9

Havauhiq 1: Parnaihimlutit 10

Havauhiq 2: Ilittuqhitilugu Ihivriuqluguluuniit Ihumagiyatit, Havaaghatit, Ikpigiyatillu 11

Havauhiq 3: Atuqtamingnik Qauyihailutik 13

Havauhiq 4: Titiraqlugit Inirumayatit, Ihuaqnighakkut Havauhighat, Havauhirniklu 15

Havauhiq 5: Titiraqlugit Atuqtittilugulu Ihuaqnighakkut Parnaiyautit 17

Havauhiq 6: Munarilugit Qauyihaglugillu Qanurininganiit 21

Havauhiq 7: Ihumaliuqlutik Titiratqigiamik Nutaannguqtiqluguluuniit Parnaiyautit 23

Ingilrutit Ikeyuutighat Parnaiyaiyaamik 23

Ihumaqhuliuqtut 23

Ihumaliugaqnut Naunaitkutat 23

Avatinik Ihivriuqhiyut 23

HAAH-nut Qauyihautit 24

Irininaqtunik parnaiyaiyut 24

Qaritauyakkuurutinit Naunaiqhiviit 25

Qanuq titiraqtuiyaamik Ihuaqnighakkut Parnaiyautinik Ingmingnut-Qauyihautit 25

TAIMAAQTIRUTIT 26

UIGUAT 27

1. Ihumaliugaqnut Naunaitkutanut Havauhiit 27

2. Avatinik Ihivriuqhiyut Titiraaghat 30

3. HAAH-nut Qauyihautinut Titiraaghat 31

4. Ihumagiyauyut, Havaaghat, Ikpigiyauyunullu Titiraaghat 32

5. Havaaghanik Parnaiyaiyut Titiraaghat 33

QANUQ ATUQTAUYUGHAT HAPKUA MALIKTAGHAIT

Ataniqtuqtuiniqmut Ilihimaghat tukliringuyut ilihagtaghat hanayauhimagut taapkunanga Nunavunmi Nunallaarnit Ilihaiyit Katimayit (MTO) ikayuutighait Miiyayunut Katimayinullu ayuiqhahiyaamik ilihimaghainik ihumaliurniqmik munaqtuniqmiklu qauhimattiarniqmik ilihimattiarniqmiklu

Una titiraq, *Ihuaqnighakkut Parnaiyaiyut Ilihaqtut Maliktaghait*, atauhiyuyq qaffiyunik ilauiyq ilihagtaghanut hapkunani aghuurnaqtuni unipkaanik.

Ilihaqatauguvit katimaqatauyunik hivuliqtiqaghutik ilihaiyimik, ilihagtaghanit pivighat iliqahiutihimagut ilittiarniqmut qunngiagaghaq, ilihagtaghat titiraqtaghait, titiraqhimayullu qaritauyakkuurutinit ilihaitjutighat. Ilihaiyuyq tuniniaqqaatit makpiraaqnik ihariagiyanik ikkuaqtiuniaqhuni ilihagtaghat apluqtaghat malighugit.

Iliharuvit ilikkut, ilihalluaqtaghatit qunngiagtaghamiittut, hapkunani maliktaghanit, ahinilu qaritauyakkuurutinit pivighanit. Pihimaitkungni huli, qunngiagaghaq, makpiraaq, ahiillu ilauiyut pivighat qaritauyanit piinnarialgit MTO-kut qaritauyakkuurutainit.

Inmikkut ayuiqhahiyaamik, qunngiagaghaq taamnalul Ilihaqtum Maliktaghait atuqtauyughat atauttikkut:

- 1. Aullaqtiqlutik qunngiagaghanut.** Aviktuqtauhimayuq qaffinut naittunik ilihautighanut haniliriiktunik parnaiyaqtauhimayunut Ilihaqtut Maliktaghainit. Qunngiagaghaq iniqtaugumi, nutqaquiniqtaugumi qunngiagaghanut hanaquyaulutillu ilanganik pitquyauhimagut havaaghat.
- 2. Havaarilugit havaaghariyatit.** Havaaghat iniqhigaangat ilihagtaghanik taapkuangulaqtut:
 - Taiguanginnaqhutik nakatamik Ilihaqtum Maliktaghainit
 - Ihumagiplugit qanuq ihuaqhainahuarniarumik ihuilutunik Katimayiplutik
 - Qaritauyakkuurutinik atuqhutik pivighanik qiniqhiaplutik ikayuutauniaqtaugumi hivunighami
- 3. Aullaqtiqklugu qunngiagaghat.** Talvanngat, hivumuqlutit tuklianut qunngiagaghanit ilihagtaghanut. Taimaa havauhiit qulaani atuqhimmaaqlugit iniqhiilugit tamangnik ilihagtaghat.

Taimaa, iniqhimalirungni ilihagtaghat, apiqhuutighaqaruvit kiuyauhimaittunik, Katimaqatigiyatit nunallaarniluuniit havaktit kiutjutighaqarungnaqhiyut ilingnut – imaaluuniit nani kiuyaulaarumik.

Ilaa, qauhimayatit taapkununga Ihuaqnighakkut Parnaiyaiyut ihumaliugait havauhiillu akliivaallirniqtaugumi havaaghat iniqpalliagumik upluq tamaat Miiyatut Katimayitullu.

QUANAQQUTIT!

MTO-nguyuyq quyagiyumayait ikayuqpaqtut Nunattiamit Havakviat Nunallaarnik Nunallaarmiillu Ikayuqtiit, Ilihaqviat Nunallaarnit Kavamaliqiniqmik, titiraqpakkamik taapkuninnga *Parnaiyaiyut: Maliktaghat Iniqhittiarumik* Ilihaqtut Maliktaghait hailiyauhimagut pivighatut hapkununga makpiraaluhimagut.



ILITTUQHITIT

Ihuaqnighakkut Parnaiyautinik titirariamik nunallaarnut taimainnahuquuqtuq, hivuani, ayuqnarniaqtutut. Kihimi, ihumaaluktailiquyauniaqtuhi ahinit havaarihimayaanit taimaa iniqtaulaaqtut aittuqtaunnaqhunilu.

Ihuaqnighakkut parnaiyaiyaamik apluraqhutik-apluraqnik havauhiyuq taapkua Katimayiit atuqpagait hivumut ingilrayaamik, naatkutigiighugit ihariagiyaait piyumayailu aallatqiiktut katimaqatigiit nunallaarnit tajja iniqtaghaqaqhutik pivighailliuqhutiklu hunaqutanik. Ihuaqnighakkut parnaiyainiq nannganaqtuq – tautuquuqhugit aliattangnaqtut havaaghat hivunighami – kihimi qauhittiarnaqtumik ilittuqhitiyuq kitut *iniqtauyughat*, kitut *iniqtaulaaqtut*, qakugulu *iniqtaulaaqqat*. Ihumagiyaahimayuq talvuuna taamna nunallaq humiittumayaaghainik tallimanik ukiunik hivunighami, qaffiyyunik ayuqnavyaktut iniqhiyumayainik, havauhighat iniqhiyaamik, kitullu havauhilluat ingilratjutauniat hivumut.

Hapkua Maliktaghat aviktuqhimayut malrungnut. *Ilanga 1 – Hunauyuq Ihuaqnighakkut Parnaiyainiq?* Ilittuqhitiyut hunauyaaghaat ihuaqnighakkut parnaiyainiq, qanuq atuqtauvaktuq, qanuqlu ihuaqtukkut atauttikkuuriaghait ahiillu, hivikittut parnaiyautit haamlatkut parnaiyaqpagaita (taapkuatut Maniit Atuqtauyughat, Angiyunut Parnaiyautit, Aulapkainiqmut Parnaiyautit, qanuqlu). *Ilanga 2 – Qanuq Ihuaqnighakkut Parnaiyautiliuriamik* uqauhiqnik tuhaqtittivaktuq ilittuqhitiyaghuni qanuq havauhiriyaamik.

Naittukkut, hapkua Maliktaghat ilittuqhitiyaktut:

- Ihuaqnighakkut Parnaiyainiqmut ihumaliukkat uqauhillaullu

- Huuq Ihuaqnighakkut Parnaiyainiq nakurutauyuq.
- Qanuq Ihuaqnighakkut Parnaiyautiliuriamik.
- Ihumagilluaqtauyut talvani Ihuaqnighakkut Parnaiyautinit.
- Kitut ilaayughat – qakugulu.
- Qanuq qauyihaiyaamik qauyihariamiklu Parnaiyautinik atuqtittiyut.

ILANGAI – HUNAUYUQ IHUAQNIGHAKKUT PARNAIYAINIQ?

Ihuaqnighakkut Parnaiyainiqmut Ilihimaghat

Hunauyuq Ihuaqnighakkut Parnaiyainiq?

Haamlatkunnit Ihuaqnighakkut Parnaiyautit angiyuq “piksautauyuq” parnaiyautik taapkua Katimayiit atuqpagait ilittuqhitiyaamik kitut aghuurnaqtut namunngauyumayaaghaalu. Ihumaliuqnaqhigumi aviktuqnaqhigumilu pivighanik, taamna Ihuaqnighakkut Parnaiyautik ikayuutauyuq itqaumagiyaamik nunallaam hivituyumi piyumayait.

Nunallaat kavamait amihunik ihumaliugaghalgit, haamlatkullu Ihuaqnighakkut Parnaiyautaittumik, Katimayiit taimaa apiqhuutigiliqpagait irinigiyaaita ihumaliuqtaghaqaraangata. Ihumaliuqhimagaangamik taapkua hivituyumik inirumayaita ihumagihimaittumik, ayuqnaittuq ahikkuuriamik.

Ihumaliuttiaqhimayut Ihuaqnighakkut Parnaiyautit kiuhiyaktuq pingahunik apiqhuutilluanik.

Humiitpita
tajja?

Humunn-
gauyugut?

Qanuq talvun-
ngaqniaqqita?





ILITTUQHITILLUAT

Ihuaqnighakkut Parnaiyainiq uqauhilik inmikkut. Hamma ilangi uqauhiit takuvangniaqtatit hapkunani titiqqanit.

Avatinik ihivriughitit: qauyihautauyut hilataanit ikpingnautauyunik aghuurutauvaktut timiqutinut aulattiarimingnik.

Iniqtaghaq: iniqhiyumayughanit uqauhilluanguyut maligaghaliuqhimayunit qauhitigiplugu kitunikiaq ihumagilluaqtainit.

Havaaghaq: uqauhiuyuq ilittuqhitiyuq timiqutim havaaghainik. Ilittuqhitivaktut timiqutit qanuriliuqpagiaghainik iniqhiyaamik kitumullu iniqhivagiaghainik. Qanuq tuhaqtittivagiagharnik niuviqtingnut (inungnut ikayuqtauvaktunut) ahinullu ilaayunut (nanminiqutilgit) huuqlu nunallaarnit kavamait talvaniittaaghainik, qanuq nakuruttiquagiaghainik mihingnautiqariaghainiklu.

Timiqutik: nunallaarnit kavamauyut ingilratjutaayuqluuniit (havakvik, aulapkaqtitauyuq, hunaqutik) talvuuna ihuaqnighakkut parnaiyautit havaangit atuqtauvaktut.

Havauhiqnik qauyihaiyut: ingilrutauyuq qauyihautauyuq qanuq havaaghat iniqtauvagiaghait qanuqlu iniqhitjutauyuq.

Ilauyut: timiqutit, katimaqatigiit inuillu nanminiqutilgit taimaaluuniit naahuriyunik havauhiqattiaqtughanik maliguattiarimikluuniit timiqutinut. Ilauyut atuqattangitait hunaqutit ikayuqtauyuittulluuniit aullaqtitauhaimayunit. Niuviqtit atauhiyut katimaqatigiiktut ilaayunit.

Ihuaqnighakkut parnaiyainiq: aulahimmaaqtuq, havauhiuyuq hivumut-tautukpalliapluni timiqutit inirumayainnut havaaghainullu.

Ihuaqnighakkut parnaiyaut: iniqhiyumayughanit hanayauyughanut naunaitkutauyuq iniqhiyumayarnut, havaaghanut havauhghanullu iniqhiyaamik tautugumayarnik.

Havauhiq: havauhilluat (iniqhimayut) iniqhiyaamik havaaghaqnik.

HAAH-nut Qauyihaitit: Titirauhiit atuqtauyut ilittuqhitiyaamik timiqutim **Hakugingniinik**, Ayuqhautainik, **Havaaghainik Amirnautinullu**. Ilauyuq Ilumiutanik/Hilataanilu Qauyihaitinut timiqutiit iniqhivagait qauyihaiyaamik ilumiutanit atuqtauyut (**Hakungniit Ayuqhaitillu**) hilataanilu ikpingnautit (**Havaaghat Amirnautillu**) mihingnautivaktut timiqutinut.

Havaqatigiit: Katimaqatigiiktut inuit havaqatigiiktumik iniqhinahuaqtut piyumayainik inirumayainiklu. Havaqatigiit havakpaktut uqautittiaqhimaplutik taimaalu pitquhiqaqpaktut:

- Havaqatigiiktumik iniqhiyumavaktut atauttimik iniqtaghamik.
- Kitunikiaq havaaghanik, piyumayainik, inirumayainiklu.
- Aulavaktut maliktaghakkut taapkuatut ihumagittiaqhugit ahiit ihumagiyaitalu.
- Uqautittiaqtughat uqautjaulutiklu ihuaqhivaalliriamik.
- Havaqatigiittiaqtughat katimaqatigiit havaaghaigut havauhiigullu.

Ihumagiyauyut: piksaluqhimayat uplumi nunallaat hivunighami qanurilinganiaqtuq.



Humiitpita tajja? Kiuhiyaamik hapkuninnga apiqhuutinik, ihivriuqtaghariyat tajja havaariyat ilittuqhilitugulu havaaghatit, ihumagiyatit, ikpigiyatillu.

Humunngauyugut? Una apiqhuutik ilittuqhitiqiyuq ilvit ilihimayarnik aullaqtittilugulu ihumagiyatit hivunighamut.

Qanuq talvunngaqnaiqqita? Una apiqhuutik akirautauyuq apqutighaliuriaqnik hivuaniiuttuq, atatapkailutik humiittaagharnik tajja humunngauyaagharniklu. Taimailiuriamik, iniriiqhimayaghatit ihuaqnighakkut havauhikkut piyumayatit, inirumayatit, hanaqiyauyughallu hunaqutik, titiraqhimalugu qanuq aullaqtiniariagharnik Parnaiyautinik.

Naittukkut, Ihuaqnighakkut Parnaiyautit:

- Nunauyatut iittuqhivitaktuq aghuurnaqtunik Katimayinut nunallaarmiunullu.
- Ikkuuqtuivaktuq Katimayinik ingilravighainut, qanuriliuriaghainik, huuqlu taimailiuriaghainik.
- Ikayuutauyuq Katimayinut katimaqatigiingniqmut ihumagiyainut uqauhiqariamiklu atauhiqmik nipiqaqhutik.
- Ilittuqhivitaktuq Katimayit hivunighami iniqniaqhimayainik inungnut parnaiyautauyuqlu nunallaarmiunut timiqutinullu havaaghainik havaariyaamik.

Parnaiyaiyut: Ilittuqhitiyuq

Ihumaliuriamik qanuq atuqniariaghainik pivighainnik timiqutim, hivituyumi, iniriamik piyumayaita timiqutim.

Haamlatkut Ihuaqnighakkut Parnaiyautait atuqtitauliqpaktut havauhghanut parnaiyautikkut iniqtauyughanut, amihuuplutik atuqtauhimayunit, talvuuna atuqtittivallianikkut



TITIQTAGHAT: HUUQ PARNAIYAIYUT?

Angiqhimaqatigiigiamik hivumut ingilravighainut.

Nanikiaq nunallaarnit, amihuuyut aallatqiiktunik ihumaqaqpaktut namunngauyaaghainik nunallaat. Parnaiyaiyut havauhiyuq katitiripluni tamangnik ihumagiyauyunik tuhaqtittiplugit angiqatigiigahuaqhutik Katimayit huliaghainut hulittailiyaghainullu.

Ilittuqhitiyaamik angiqatigiiktut.

Parnaiyautik – angiqatigiingniqmullu havauhiyuq taimaa iniqhiyaamik – ikayuutauyuq nunallaarmut, maniktarvingnut, kavamatkut timiqutainut, ahinullu timiqutinut ilihimayaamik humunngauyaaghainik.

Ihumaliurutauyuq kitut aulattariaghainik kitullu aulattianngittut.

Parnaiyautaittumik, ihumaliurutighaittuq iniqhiyaaffingnik aghuurnaqtunik piyumayauyunik. Parnaiyautiqaqhutik, ilitturinnaqtut kitut aulattiaqtut, kitut aulattianngittut, kitumiklu ihuaqhaiyaamik hivumuuqhutik.

Ikiqhivaalliriamik inmikkut timiqutinillu unaguhuutit

Ilitturinnaqtumik ingilravighaittumik, kiuhiqyauniaqtutit tamangnut nutaanut ihumaaluutinut aghuuqtaulutiklu ilittuqhitiittumik aullaqtitauhimayunik inirumayanik irininaqtuniklu. Unagunaitqiyauyuq ilihimayaamik humunngauyaagharnik huuqlu.


Naahuriyaamik nuivalliyunik ayuqhautinik

Parnaiyaiyut taimaittuq naahuriyaamik ingilrauhinik ayuqhautiniklu atuqtautinnatik parnaihimaniqmiklu ihuaqhaiyaamik.

Aturahuattiaqhgut pivighatit.

Parnaiyainikkut ihuaqnighakkut atuqtittinahuaqpaktuq ikittunnuuyunik pivighanik – upluqhiutinik, maningnik, inungniklu.

ahinik parnaiyautinik. Hapkua ihumagiplugit, taamna nunallaat Ihuaqnighakkut Parnaiyautit ihumagiyaulaaqtuq taimaa *qutangnaitjutit* parnaiyautit.



Hitamauyut Avighimaniit Parnaiyainiqmut

Uqaqhimayutut hivuani, Ihuaqnighakkut Parnaiyautit titiraqhimayulik ahinut, qauhittiarnaqtunik parnaiyautinik taapkua haamlatkut titiraqhimayaghait. Kihimi, Ihuaqnighakkut parnaiyautit inmikkut ikkuaqtuqtauyuuq uqaqhilluanguyunik tuhaqtittiyunik haamlatkut Ihumagiyainik, Havaaghainik, Ikpigiyaainiklu.

Talvuuna, nunallaarnik parnaiyainiq aulavaktuq hitamauplutik “avighimaniit”:

Uqauhiit Ihumagiyainut, Havaaghainut, Ikpigiyaainullu ikkuaqtuivaktut taimaa:

- Minguliqhiplutik piksautimik hivunighami nunallaam inirumayainik.

- Tuhaqtittiplutik Katimayit havaaghalluaganik qanuqlu iniqniaqhimayaaghainik.
- Tiguplugit atuqhugillu ukpiriyavut ikkuaqtuutiyut havaaptingnik – tajja hivunighamilu.

Ihuaqnighakkut Parnaiyainiq hivituyumik parnaiyautauyuq taimailiuqtumik:

- Angiyunik iniqtaghalik tallimanik ukiunik atuqtughanit.
- Ihumaliuqhimayut nakuuniqhanik naunaitkutaqaqhutik nunallaavit hilataanit ilumiutanilu avatiinit.
- Tunngaviyuq ukiumut, aulapkainiqmullu parnaiyainiqmut.

Aulapkainiqmut Parnaiyainiq ukiumut parnaiyautauyuq:


- Ilittuqhitiyuq naunaittiaqhutik iniqhimayukkullu qanuq taimaa, ukiumi atuqtughami, nunallaat ingilravallianaqtuqhivumut ilittuqhitihiyuuq talvani hivituyumi atuqtauyughanit parnaiyautinit.

Havaaghanik Parnaiyainiq parnaiyautauyuq iniqhiyaamik kitumikiaq inirumayarnik ikkuaqtuulutikluuniit kitumikiaq havaagharnik. Taimailiuqpaktuq:

- Ilittuqhitiyaktuq naunaittiaqhutik iniqhimayukkullu qanuq havaaghaq iniqtauniariaghaat qauyihaqtaulunilu inittariaghaanik.
- Ilauptilaaqtut havaaghanik iniqnarilaaqtunik qaffinik tatqiqhiutinik – qaffinikluuniit ukiunik – iniqhilutik, ihumagiplugit taapkua aktiniit ayuqnaqniillu.



Imaatut tamangnik naammagiittiaqpaktut.



Ikayuutit taapkununga Nunallaarnit Ihuqniqhakkut Parnaiyautit

Ihuaqniqhakkut Parnaiyautinut Havaqatigiit taapkuanguyut inuuplutik tunngaviyut parnaiyainiqmut havaaghanut. Ilauyut hapkununga havaqatigiingnut taapkuanguvaktut:

- **Miiyaayuq:** parnaiyainiqmut hivuliqtiuyuktuq
- **Katimayit:** ihumaliuqtit katimayiralaanullu hivuliqtiit
- **SAO/CAO-nguyuy:** unniqtiulluaqtuq, parnaiyi, naunaiqhiviupluni.
- **Atannguyaq Maniliqiyinit Titiraqtia:** unniqtuiyilluaq tamangnut havakvium iluani maniliqiyinut.
- **Havakviit atannguyait:** unniqtuiyilluat munaqtaghaita mighaagut.
- **Tikkuaqtuiyut ilauyughalluanik:** inuit nunallaarnit mihingnautiqalaaqtut taapkununga Ihuqniqhakkut Parnaiyautinut.

Aallat haamlatkunni havaktut ilauqyauniarungnaqhiyut ilangannik parnaiyaiyut havaanginnut taimaa katimayiuuplutik ihumagilluaqtainut “havaktitauhimayut katimayit”. Taapkuatut, havaktit talvanngat Maniliqiyit Havakvianit apiriyauuniarungnaqhiyut naunaittiaqhimayaamik maniliqiniqmut qanurininganianik ilittuqhitiyauhimaghaq talvani Ihuqniqhakkut Parnaiyautinut.

Kinauva taamna Nunallaarnit Ihuarnighakkut Parnaiyautinut Ilauyuy?

Taamna ilittuqhitik “ilauyumut” ilaani qauhimattiarnaittuq.

Ilauyuy taamnaulaaqtuq inuk, katimaqatigiit, timiqutikluuniit ihumavaktut ihuaqtukkut ihuittukkulluuniit ikpingnautaulaaqtuq inirumayainnut, piyumayainnut, havaaghainullu titiraqhimayut talvani Ihuqniqhakkut Parnaiyautinut. Aghuuqpaallirumannaqtut inuit



kivgaqtuiyut uqauhiinik ilittuqhitigiighutik nunallaarmiutat. Ihumagiplugu una ilittuqhitik, ihumagiplugu aktinia nunallaaq, ilaayut taapkuangulaaqtut:

Mikiyut Nunallaat:

- Nuatqatigiit
- Aulapkaiyiryuat angiyunik hannavingnik nunallaam iluani
- Nunallaarmiutat nanminiqnik aullaqtittilihaat taapkualu nanminilgit
- Kivgaqtuiyut nunallaarnit ilihaqvingnik
- Kivgaqtuiyut aanniaqtuliqiyunit inuliqiyinillu havakviinik
- Kivgaqtuiyut nunallaarnit angaatjuvingnik
- Inulrammiit katimayiit
- Nunallaarnit kivgaqtuiyut qitiqmiunit/aviktuqhimayunit kavamatkut havakviinik
- Ikpiguhuutilgit ilaayut havaktiunngittut haamlatkunnit, kihimi annirnaqtut aulapkaiyaamik (taapkuatut, katimaqatigiit havaktinut, kaantulaaktitayut ikayuqtit)
- ... ahiillu

Angiyut Nunallaat:

- Aulapkaiyiryuat inuit qulliqtuutainik
- Aulapkaiyiryuat nunallaarnit nanminilingnut katimayiit
- Kivgaqtiit ilihaqpaalliqvingnik
- Kivgaqtiit ikayuqtinik/inuuhiqattiaqniqmut havaaghanik aullaqtittiyut katimayiit
- Tutquumaviit atannguyait
- Tuhaayaghat ahiillu tuhaqtittiyut kivgaqtiit
- Kivgaqtiit Kavamaunngittunik Timiqutinik (NGO-nguyut)
- ... ahiillu

Huuq ilaayunik ilaupkaiyaamik ihumaliuttianguva?

Nakurutayut ilaayut katimaqatigiyaamik hanayut Ihuaqnighakkut Parnaiyautinik taapkuanguyut:

- Ihuatqiyauyuq ihuaqnighakkut hanavalliayaamik aallatqiingnik naunaiqhitivaktunik, uqauhiqnik, qauhimayaniklu.
- Nunallaarmiutanut ilaувaktunut naunaiqhitiyuq Katimayiit inirahuaqtainik.
- Ihuatqiyunik havaaghanik tikkuahivaktut.
- Angiqtauhimalutik ilitturinnaqlutiklu ihumaliuqhimayait ihumaliurniqmullu havauhiinit.
- Iniqniaqhimalugit nanminiqutigilugillu ihuaqnighakkut aullaqtirutait.
- Havaaghat hakugighaiyaamik hanatuniit ayuiqhaplutiklu timiqutinik kikkiliuqhimayunik.
- Hanavalliyut havakvingnit havaktighanik nanminilingnit aviktuqhimayunilu havaaghanit

Ilaupkaiyut Ayuqnaqtunut Ikayuqtinik

Iharianaitkaluaqhuni, ihumaliuttiaqnaqtuq ilaupkaiyaamik unniqtuiyunik ayuqnaqtunut ikayuqtittilugit hanatillutik Ihuaqnighakkut Parnaiyautinik. Ikayuqtighailliuriamik ayuqnaqtunut qaffinik nakurutilik:

- “Hilataanirmiut” ayuittumik ilihimattiaqtumiklu ilaulaqtuq taimaa ilumuuttutut maniliqiyit – ihumagiyainik unniqtuipluni ihumaliuqtauhimaittunik hivuanit atatayumik nunallaarmut.
- Tikkuqtauhimattiaqtut unniqtuiyit ilihimayainik ilittuqhitivaktut ayuitamingniklu ihariagiyaulaqtut haamlatkunnit havaktighaliuqhutik atauttikut.
- Unniqtuiyit ayuqnaiqpaalliutivagait havaaghaita parnaiyaiplogu parnaiyautit.

Ayuqnaqtunut unniqtuiyut ikayulaaqtut ilanganik tamangnikluuniit hapkuninnga:



- Parnaiyaiplugu havakviup hanauhiata taapkua Ihuaqnighakkut Parnaiyaiyit Havaqatigiit.
- Havauhilluakkut havakviqarlutik aullaqtiqvianit taimaaqtiqvianut.
- Ilittuqhaiplugit aallatqiiktut inuit tikkuaqtauyughat aallatqiingnut havaktitauyunut katimaqatigiingnut, ihumagiplugit ihariagiyaat nunallaam, ayuitait, katimaqatigiiklu kivgaqtuqtait.
- Ilittuqhitiplutik katimapkaiplutik aullaqtilihaaqtut havauhiinit.
- Hanaplugu naunaitkutanut tutquumaviit atuqtainik qauyihariamik.
- Ikkuuqtauplutik nunallaarnit parnaiyiniq havauhikkut.
- Uqaqtiupluni katimayunit.
- Titiraqhugu kingulliqaat titirautait Ihuaqnighakkut Parnaiyautinit.
- Ilittuqhaiplutik havaaghanik nakuuyukkut tuhaqtittiyikkut ilittuqhitiyauyaamik, ikayuqhutik parnaiyaiyiniq inuit katimavighainik, ilaupkaivallianahuaqhugit



APIQHUUTIT APIRIYAGHAT PARNAIYAIPLUTIK.

- ☐ Humik nunallaat naahurivat uvaptingnit?
- ☐ Humik naahurivita uvaptingnit?
- ☐ Qanuriliuqtughauvita?
- ☐ Qanuq hivunighavut tautugumavitku?
- ☐ Qanuq talvunngaqaqita?

katimayunut nunallaarnilu qauhitivallialugit qanuq parnaiyaiyut havaaqariaghait.

- Ihuaqnighakkut havauhiqnik atuqtittivalliyut.

Nakurutaugaluqhutik, ayuqnaqtunut unniqtuiyut iniqhimayaaghainik munaqtiuyughaunngittut hanayunik Ihuaqnighakkut Parnaiyautinik. Miiyauyuq, Katimayit, haamlatkullu titiraqtiit nanminirilugu havaariyaghaat. Unniqtuiyit ikayuqpaktut. Haamlatkut hivuliqtuivaktut.



IHUAQNIGHAKKUT PARNAIYAINIQMUT ILIHIMAYAGHAT: INGMINGNUT-QAUYIHAUTIT

1. Kitunik pingahuuyunik apiqhuutinik taamna Ihuaqnighakkut Parnaiyautit kiuhiavkpa?
✓ Ihivriuriamik, takulugu *makpiraq 4*.
2. Taamna Ihuaqnighakkut Parnaiyautit ilittuqhitiyuq taapkuninnga "qutangnaitjutit parnaiyautinik." Qanuq taimaa qauhittiarnaqqa?
✓ Ihivriuriamik, takulugu *makpiraq 4-5*.
3. Qanuq havaaghaqqat Katimayit taimaa ihuaqnighakkut parnaiyaiplutik?
✓ Ihivriuriamik, takulugu *makpiraq 6*.
4. Kitut ilittuqhitiunaqqat taapkuninnga Ihuaqnighakkut Parnaiyaiyunut *ilauyut*?
✓ Ihivriuriamik, takulugu *makpiraq 7*.
5. Qanurittumik havaaghaqarniat, piqaqqat, taapkua ayuqnaqtunut unniqtuiyit hanayunik nunallaarnit Ihuaqnighakkut Parnaiyautinik?
✓ Ihivriuriamik, takulugu *makpiraq 7*.



ILANGA II – QANUQ HANAYAAMIK IHUAQNIGHAKKUT PARNAIYAUTINIK

Havauhiyuuq hanaplutik haamlatkunnit Ihuaqnighakkut Parnaiyautinik ayuqnaqtughaunngittuq. If havaaghariyauyuq nutaannguqtiriamik hivulliqnik Ihuaqnighakkut Parnaiyautinik aallannuqtiqlugu atuqtauvia tallimat-ukiut taimaaraangat, havaaghat iniqtauvaktut avatquttailiplugit qaffiyut Santiit tamangnik ilauyut ilihimattiarumik iniqhittiarumagumiklu havauhiqnik.

Taimaa hanayughauguvit – hanayumaguvilluuniit – nutaanik parnaiyautinik nunamit qunmut, taapkuatut nutaat Katimayiit havaktitaurumik niruaqtaaqhimaliqqata haamlatkut, havauhiit ayuqnaittut huli. Hivituuyutqiyauniaqtuq kihimi.

Katimayiit qarritjivaktut amihunik ilihimayainik nakuuyumik parnaiyaiyaamik: iniqhiyumayuktut nakurutighainik nunallaat; ilihimattiaqtait inittiarumaniq iniqhiiniqlu; iqhiittutiklu aniaqattariamik nipliqhutik ihumamingnik. Taapkua aajjikkutauyut ayuitait ikayuutigiyait niruaqtauyaamik Katimayinut ikayuutigivagait katimaqatigiyaamik haamlatkut ihuaqnighakkut parnaiyaiplutik.


Amihuuyut haamlatkut Ihuaqnighakkut Parnaiyautait amihuuvaktut makpiqqat titiraqhimayut, kihimi taimainngitkaluaqlutik. Ayuqnaitqiyauniaqtuq tuhaqtittiyaamik Parnaiyautit titiraanginnik nunallaarnut taimaa piksaluqhimayukkut PowerPoint-mik, qaffiniklu naunaitkutakkut, nivinngaqtaghakkut naunaitkutakkut, avugiiktumikluuniit havauhikkut, taki ai? Aghuurnatqiyauyuq tuhaqtittiyaamik Parnaiyautinik ilitturinnaqtukkut qauhimattiarnaqtumik ilauyunut.

Taamna haamlatkut Ihuaqnighakkut Parnaiyautait aniguqtitaupat, inirumayaita aallannulaittut kihimi Parnaiyautit talvaniighaarumik titiraqhimayaatut atuqtauvighaanit. Kihimi, ihuaqhaivangniat ilangi ilikkuuqtut havauhighat havaaghanilu iniqtauyughat naahuriyauyutut. Ukiuq tamaat hitamaiqtuqhutikluuniit naunaiqhitjutit aulattiaqniinut havaaghainit nuivalliyut Parnaiyautinik ikayuutauniaqtuq Katimayinut havaktinullu ihumaliuriamik ihuaqhaiyariaqqaqat.

Kaivitaqtut Ihuaqnighakkut Parnaiyautinut Havauhiit

Ihuaqtauyuuq ihumayaamik taimaa ihuaqnighakkut parnaiyainiq kaivitaqtuq havauhiyuuq.

Taapkua Ihuaqnighakkut Parnaiyautit “taimaaqpiayuittut”. Kihimi, aularaaqhutik aallannuqtaqhutiklu atuqtaq, aallannuqtauvaktut ilaita titiraangit ilaanilu nutaannguqpiqtauvaktuq ihumagiplugit iharianaqtut nuivalliyunit.



Hapkua utiqtaqtut havauhighat ilittuqhitiyauhimagut naunaitkutanit ilittuqhitiyauyut kinguani makpiqqanit.

Ihuaqnighakkut Parnaiyaiyut Havauhiq 1: Parnaihimalutit

Taapkua Katimayiit ihumaliuqhimagumik taimaa nutaat Ihuaqnighakkut Parnaiyautit iharianaqhiyut amihuuplutiklu Katimayiit ilihimattianngitait hughaungmangaata parnaiyautit, irinikhuklutik ilittuqhitiyaghariyut. Taimaa naunaiqhithilugit katimaqatigilugit ilihimattiaqtut Katimayiit, SAO/CAO-nguyuuq, Kavamatkut Nunavunmi kivgaqtiit, unniqtuiyit, avugiiktunikluuniit hapkuninnga. Katimayut ikayuutauniaqtut Katimayinut ilihimattiarimik:


- Hughauyaaghait haamlatkut Ihuaqnighakkut Parnaiyautit.
- Qanuq Ihuaqnighakkut Parnaiyautit parnaiyaqtauvaktut (taapkuatut, titiraangit takupkaqtitaghailu iniriqhugit)
- Aallatqiingniit taapkua iniqtauyumayut, ihuaqnighakkut havauhighat, havaaghat/ iniqhimayut.
- Munaqtaghaita Miiyauyum, Katimayiit, SAO/CAO-nguyum, haamlatkut havaktiit, ahiillu ilaayut hanayunik Ihuaqnighakkut Parnaiyautinik.

Ilihimattiarighutik taapkua Katimayiit, tukliq havaaghauyuuq taimaa katitirilutik Ihuaqnighakkut Parnaiyautinut Havaqatigiingnik. Taamna Miiyauyuq Katimayiillu munaqtiulluangugamik haamlatkunni parnaiyainiqmik, Katimayiit tamatkiumayutut – tikkuaqhimayuqluuniit Katimayinut Katimayiralaat (taapkuatut Ihuaqnighakkut Parnaiyit Katimayiralaat) – hivuliqtiuvaktut.

Taamna SAO/CAO-nguyuuq ilaanilu atauhiq qaffiuyulluuniit ayuqnaqtunut unniqtuiyit ilaungangiaqtut Katimayiralaanut unniqtuiyit titiriamiklu unipkaariyut ihumaliugaillu. Havaktitauyut katimaqatigiit, hivuliqtiyayuktut Havakvium atannguyaamik (taapkuatut Aulapkaariyuuq Maniliqiniqmut, Aulapkaariyuuq Parnaiyainiqmik Nunaniklu, Ulapqipkaariyut Aulapkaariyuuq, Tuhaqtitiyut Aulapkaariyuuq, qanuqlu), aullaqtitaulaqtut ilittuqhitiyughat kitunikiaq ihumaalutunik taimaaluuniit havaaghat inirahuaqlugit (taapkuatut HAHA-nik qauyihaiyut) naunaiqhithilugillu taapkua Ihuaqnighakkut Parnaiyit Katimayiralaangit.

Talvani angitqiyaniit nunallaarnit tahapkua ihuaqnighakkut parnaiyaiyut ayuqnatqiyauvaktunit, ikayuutauniaqtuq tikkuaqhiyaamik *ihuaqnighakkut parnaiyighamik* titiraqhimayaamik tamangnik havaangit taimaalu iniqhivalliayaamik havakvighainik.

IHUAQNIGHAKKUT PARNAIYIT HAVAQATIGIIT



Makititaugumik, taapkua Ihuaqnighakkut Parnaiyaiyut Katimayiralaat hivulliqaat havaaghait taimaittughaq angiqatigiiklutik havaughanik ikkuaqtuutighaq havaqatigiingnut havaaghanullu. Taapkuatut:

- Kina ihumaliuqniaqqa? Miiyauyuq Katimayiillu? Havaktitauyut katimaqatigiit ihuaqhainahuaqtut hunanikiaq unipkaaqtanik? Ilauyut inuit katimaviinit? Qanuqlu
- Qanuq ihumaliuqpangniaqqa? Amigaitqiyaugumik niruaqtittigumik Katimayinik? Angiqatigiikkumik Katimayiit? Nunallaarmiut niruaqtitaugumik? Qanuqlu
- Qanuq kitukiat ilauyut ilaupkaqtitauniaqqa? Aulahimaaqtumik ilaupkaqtitaulutik havauhrnut? Takupkaqtittilutik qakugunnuraangat havauhiqnit? Ilaulutik tautuutiplutik qaritauyakkuuqtunikluuniit apiqhuutikkut? Qanuqlu
- Qanuq taapkua Ihuaqnighakkut Parnaiyaiyut Katimayiit tuhaqtittivangniaqqaq ilauyunik – kialu naunaitkutaigut pinnaqhikpat?

Apiqhuutit hapkuatut ihumaliuqtauyughat havaarilihaaqhugu parnaiyaiyut.



PARNAIYAIYUT HAVAAGHAIT TITIQTAGHAIT

- ☐ Parnaiyaiyughanik havaqatigiighanik tikkuaqhiluhi.
- ☐ Maligaliqiyikkut iniqhiyumalutik hivuliqtuilutiklu.
- ☐ Tikkuqaqhilutik Ihuaqnighakkut Parnaiyighamik.
- ☐ Ihumagilugit taapkua katimaqatiginahuaqlugillu ayuqnaqtunut unniqtuiyit ikayuqtiqhat.
- ☐ Iniriiyaqlugu timiqutim hanauhia.
- ☐ Angiqhimalutik tamangnut timiqutim maliktaghainut havaaghanullu parnaiyautainik.

Ihuaqnighakkut Parnaiyaiyut Havauhiq 2: Ilittuqhitilugu Ihivriuqluguluuniit Ihumagiyatit, Havaaghatit, Ikpigiyaillu

Naunaiqhitittiaqtinnatik taapkuninnga ihuaqnighakkut parnaiyaiyut, aghurnaqtuq ihivriutqigiamik tunngavigiyaita tamangnik havaaghatit tunngavigiyaghainik: haamlatkut ihumagiyait, havaaghait, ikpigiyaillu. Ihumaliuttiaqnaqtuq hapkua katimaqatigiiktumik havaaghariyaamik ilaupkaqhugit Katimayiit, tikkuaqtauhimayut haamlatkut havaktiit, nunallaarmiullu kivgaqtiit. Qaffiyut havauhiit atuqtaulaaqtut ihumaliugaqnik ihuaqhaivalliaaamik hapkununnga aghurnaqtunut uqauhirnut unipkaaqtayut ataagut taamna *Ingilrutit Ikayuutighat Parnaiyaiyut*.

Ihumagiyaqnut Uqauhiit

Una naittuq, qauhittiarnaqtuqlu uqauhiq ilittuqhitivaktuq qanuq nunallaarmiut niruaqtauhimayullu Katimayiit naahuriyut nunallaarmingnit tallimanit-10-nikluuniit ukiunit.

Nakuuyuq Ihumagiyaqnut Uqauhiq taimaittuq:

- Hivumuinnaq ihumayut.
- Hanatuyuq.
- Nannganaqtuq.
- Ilittuqhitivaktuq qanurittaaghaat iniqhittiaqtut.
- Ilitturinnaqtuq ayuqnaittuqlu tuhaqtittiyaamik.

Ihumagiyaqnut Uqauhiit iliqahiutiyunik hapkuninnga havauhittianik ikayuutauniaqtuq aullaqtittiyaamik havaqtittiyaamik niruaqtauhimayunik katimayinik, haamlatkunni havaktiit, nunallaarmiuniklu havaqatigiiktumik iniqhinahuariamik nunallaaqtut.



Ilittuqhitiuyut (atuqtauyumik) Nunallaarnit Ihumagiyainut Uqauhiit

ICEPICK-kut Ihumagiyait Hivunighamut
Haamlangat Icepick-kut tunnganaqtuq nunallaaq ingilralukaaqhutik manighiuqhutik, halumayumik avatilik, nakuuyunik ulapqivilik ilitquhitsuviqaqhutik, kiuhilaaniklu inuliqiyilgit ikayuqtinik talvani tamangnik amirnaiqhimayut, inuuhiqattiaqtut, havaaghaqattiaqhutiklu iniqhittiarimik aliahuttiarimiklu.

Havaaghanut Uqauhiit

Aallanngatqiyaupluni nannganaqtumit Ihumagiyainut Uqauhiit, Havaaghanut Uqauhiit ilittuqhitiullaqtuq haamlatkut havaaghainik. Ilittuqhitiuyuq huuq haamlatkut talvaniittut timiqtitut.

Havaghutik iniqhinahuaqhutik Havaaghanut Uqauhiqnik ihumagiplugu nunallaat aghuurnaqtut taimainmat, ingattauyut uqauhiit taapkua Ihumagiyatit Ikpigiyatillu, atuqtaulluaqniaqmat tikkuaqhiyaamik inirumayarnik, havauhiqnik, piyumayaniklu – qauyihaiplutiklu havaaghat hivumuuttiarighainik.

Naittukkut, Havaaghanut Uqauhiit puiguqtailivagait Katimayit havaaghainik, havaghimaquiplugit iniqtaghainut, ilittuqhitiuplunilu qauyihaiyaamik inittiaqhimayanik.

Ilittuqhitiuyut (atuqtauyumik) Nunallaarnit Havaaghanut Uqauhiit

Haamlatkut Icepick-mi Havaaghait
Haamlatkunni Kavamatkut tuniqhihimainnaqtut nunallaarmiut inuuhiqattiaquplugit aullaqtittiplutik kayumiktunik ihuaqtuniklu haamlatkut aulapkaqtainik ikayuutiniklu ihuaqhivalliavaktut nuivalliayunit ihariagiyamik, ihumagittiaqhugit ilitquhiit, ilaupkaiplugit inuit, havaktighaliuqhutiklu.

Ikpigiyanut Uqauhiit

Ikpigiyanut uqauhiit – ilaani ilitturiyauvaktut taimaa ikkuaqtuutitut – aularaaqpaktut, piqpagiplutik, ilitturinnaqhutiklu qitqanin ukpiruhuutait. Ikayuutaavaktut ilittuqhitiuplutik haamlatkut timiqutaita *ilitquhiinik* taimaa ilittuqhitiuplugit ikpigiyavut aghuurutigiyavut. Qitqaninngaaqtut ikpingnautit/maliktaghat aularaaqnaqtughat; ilauyut ilingnut hivituyunik ihuaqnighakkut havauhighat tunngaviinut.

Iqalungni Uqauhiit Qitqaniittunik Ikpigiyainut

IKPIGIYAVUT

Kivgaqtuittiaqniq

Haamlatkut maligaliqiyit havaktiit pittiaqtughayut ihumagiplugit ikpigiyauyut havauhiillu titiraqhimayut talvani Maliktaghat Havauhiqattiarinimut Maligaghaliuqhimagut.

Inuuhiqattiarinik

Nakuuniqhakkut ikayurahuaqhutik taimaa pittiarahuaqhutik havauhiqattiarahuaqhutiklu.

Pittiaruhiit

Nakuuniqhakkut nunallaarnik maligaliqiyittiarahuaqhutik ilihagtittiplugit havaktiit ilihaiplutik hivuliqtiuplutiklu.

Nakuuniqhakkut

Nakuuniqhakkut hanahimmaarahuaqtut ihuaqhautighanik havaqatigiplugit nunallaarmiut.

Havaqatigiiktut

Nakuuniqhanik havakviqattiaqhutik parnaiyattiaqhimanikkut, havaqatigiingnikkut, tuhaqtittigiingnikkullu katimayivullu.

Hivuliqtiuninik

Maliguaruminaqlutik ahinut, taimaalu, hivuliqtiuluhi. Naahuriyauyutit ilittuqhitiyaamik hivuliqtiunimik ihumagittiaqhugu Maliktaghat Havauhiqattiarinimut Maligaghaliuqhimagut.





IHUMAGIYAIT, HAVAAGHAIT, IKPIGIYAINULLU HAVAAGHANUT TITIQTAGHAT

- ❑ Ihivriuqlugu Ihumagiyatit, Havaaghatit, Ikpigiyatillu titiraqpaalliqtinnaatik ihuaqnighakkut parnaiyautinik.
- ❑ Katimapkailugit nunallaarmiut tuhaqtittiplugit ihumagiyainik hivunighamut.
- ❑ Apirilutit: hapkua pitquyauhimagut iniqtauhimavat nakuuyumik Ihumagiyanut Uqauhirnut?
- ❑ Havaaghanut Uqauhiliuqlutik tighuyumik haamlatkut havaaghainik qanuqlu hivumuuqpalliyaaghainik.
- ❑ Atuqlugit Ikpigiyanut Uqauhiit naunaiqhiyaamik timiqutit ilitquhianik taapkua haamlatkut piyumayainik.

Ihuaqnighakkut Parnaiyaiyut Havauhiq 3: Atuqtamingnik Qauyihailutik

Piyumayaita atuqtamingnik qauyihaiplutik taimaa ihivriuqhiyaamik qanurittaaghainik nunallaarnit talvanilu haamlatkut kuapuriissaanit. Naahurittiarnaqtunik ihumagiyaamik nunallaam haamlatkullu hakugingniinik ayuqhautailu, havaaghatit, amirnautit, maliguminaqtut, ingilraviillu ilitturinnaqhivaalliqpaktuq qanuq aallannguqtiriyaamik nunallaam ihariagiyaanut nanngariyainullu.

Atuqtamingnik qauyihautit aullaqtitauvaktuq naunaiqhitinik katitiriylutik.

Naunaitkutaqattiaqlutik mighaagut avighimagut uqauhiillu aghurnaqtut nunallaarmiunut haamlatkullu kuapuriissaanut. Naunaitkutahiuqlutik ihariagiyaayut taapkununnga:

- Naunaiqhitit titiraqhimayaita haamlatkut havakviit nunallaarmiullu timiqutait.
- Inugiangniinut naunaitkut katitiqtauyut taapkuninnga Naunaiqhitiviit Kanatami taapkualu Nunavunmi Kavamatkut havakviit.
- Taaksiiyautinut naunaitkutat.
- Hanavallianiqmut tughirautit.
- Aulapkaqtitainut ilauyut naatjuhiit
- Nanminilgit havaangit.
- Haamlatkut maniliqiniqmut havauhiit.
- ... qanuqlu taimaa.

Ihuaqutauniarungnaqhiyuq katitiriyaamik naunaitkutanik nunallaarmiutat pitquhiinik talvuuna:

- Ilihaqtitauplutik nunallaarmiut katimaviinut.
- Qaritauyakkut taututigiighutiklu apiqhuplutik qauyihaiplutiklu.
- Atauhiutigiighutik katimaqatigiighutiklu apiqhuplutik.

Ilingnik apirilutit: nani naunaitkut ihariagiyaatka naniniaqqigit?

Tigumiaqhutik naunaitkutanik, hapkua kinguani aallatqiiktut qauyihautaulaqtut:

- Havakvingnik qauyihaiyut: kitut timiqutit, inuliyut nanminiuyullu, aulavat nunallaarnit, qanuq havaaghaqqat havaktiqaqqallu, qanurittunik ingilratjuhiqaqqat (taapkuatut, aklivaalliqut mighivaallirumikluuniit, hanaqilukaaqpalliat hanaqihuiqpalliavalluuniit, qanuqlu), qanuqlu aulapkaiaat ihuaqhivaalliqnaqqa ikayuqaalliriamik nunallaangat?
- Inugiangniinut qauyihautit: tajja qanuq inugiangniqaqqa, havaktiukaffuktut, pulaaqtillu nunallaarnit? Hapkua avugiiktut



aallanguqpalliavak? Hunavaluit humunngauvallianahugivigik?

- Nayugaqnik qauyihautit: atuqhugit nunaayat parnaiyautillu titiqqat, qanuq aktigiyunik nunat tajja atuqtauyut huuqlu, qanuq aktinia atuinarianikpa iharianaqqat, qanuqlu aallanguqtauyariaqqat nunallaarni kikkiliuqhimayut? Qanuq aktigiyunik nuna nunallaam kikkianit nanminiriyaat haamlatkut kuapuriissait qanuqlu aktigiyunik nanminiqaqtunut?
- Maniliqiniqmut qauyihautit: ihumagiplugit utuqqait naunaitkutut hivunighamilu atuqtauniarahugiyut, qauyihautit hapkua ikayuutauyut parnaiyainiqmut naahuriyaamiklu haamlatkut maniliqinikkut havaaghainik.
- Qauyihautit nunallaam manighiurutainut qanurininganiinik manighiurutighaniklu.
- Qauyihautit nunallaam pitquhiriyainik pivighanik, avatiliqiniqmut ihumaalutitut, hilalu aallanguqpalliyumi amirnautinullu.
- Qauyihautit inuuhiqattiarniqmut ihuilutunik taapkuatut havaaghaqhiurniq, niqighailliurniq, inugiangniit inutquaqpalliyut, ihuinaaqtut, huniqlukturniq, inuuhirnik quviahuutiniq, ahiniklu.
- Qanuq havauhighaliuqlutik mikitqiyait nunallaarnit ihariattiyunik inunngnullu ahiittunik ihariattiyunik.
- Qauyihautit nunallaarmiutat irinigitqiyainik taapkuatut ikluqpaghaliuqviit, ayuqnaitut ikayuutit, ikluqpaghat, aanniaqtailiniq, qayangnainniq, pitquhiit, ilitqihinullu nanminiit, qanuqlu.

Nunallaarnit atuqtaffingnit ihumaliurutauniaqtuq qanurittunik qauyihaiyaamik. Ilangi hapkua qauyihautit ahiittunik qauhimaqhaungmata ilihahimalutiklu, apiriyumaniqatit

ayunqaqtunut unniqtuiyit ayuittulluuniit ahinit havakvingnit kavamatkunnit ikayuqulugit.

Ihuaqhaiyaamik qauyihaiyut qanurininganiinik tuniqhihimayaayaamiklu iniqtaghainut, nakuuyuq parnaiyaayaamik hulilukaaqvighanik tuhaqvigiyaamik amihuuyut ilauyut qauyihailutiklu atauttiklut. Taapkuatut, katimavighainik parnaiyailaaqtutit talvuuna ilauyut aviktuqhimalutik uqauhiqaqlutik havakvighaanut aallatqiingnik havaqatigiitkat katimaqatigiit, tamangnik katimaqatigiit aallatqiiktunik ilauyuqarlutik. Tikkuqaqtauhiimayumi katinnaqhikpat, havaktitauhimayut katimaqatigiit katinnahuat ilittuqhitiyaamik ilihimaliqtaait unipkaariamiklu qanuriliutiniariaghainiklu hivunighami nunallaarnut.

Ihuaqnighakkut Havauhiqnut Ilittuqhitit

Aippaalu aghuurnaqtuq qauyihautik unipkaaqaunngittuq qulaani taamnauyuq *ihuaqnighakkut havauhiqnut ilittuqhitit*, atuqtauvaktuq qauhittiarimik ilumiutanik hilataarniqmiullu ihumaliurutauvaktut haamlatkut kuapuriissaanut nunallaarnullu. Taimaitpat, apiqhuutit apiqhuqtaghat taapkuanguyut:

- Tamatkiumayumik, qanuriliuqpakpita nakuuyumik nunallaaqtut?
- Kitut haamlatkuni havakviuyut aulattiaqtumik iniqhivaktut irinigiyaainik?
- Kitut timiqutit nunallaarnit hakugiktumik ikayuqtiuvaktut nunallaarmi inuuhiqattiarniqmut?
- Tamatkiumayumik, qanuq haamlatkut hanaqittianngittut, qanuqlu ihuaqhiniqqa?
- Kitut haamlatkunni havakviit ayuqhautiqaqat iniqhiyaamik irinigiyaainik?
- Kitut timiqutit nunallaarnit ayuqhaqpakpat, qanuqlu ikayuqtaunniqqat?
- Qanurittunik nakurutiqaqqita haamlatkut kuapuriissatut nunallaaqtullu?



- Kitut kinguvautigivagaqqut haamlatkut kuapuriissatut/nunallaaqtut?
- Kitut hilataanirmiut ingilrayut maliguminaqtullu nakurutauniaqqat nunallaarnut?
- Kitut hilataanirmiut ingilrayut maliguminaqtullu nakuunngittut nunallaarnut?

Kiutjutit apiqhuutinut taapkuatut qulaani ikayuutauniaqtut ilingnut HAHA-mik qauyihaiyaamik, titiraqhimayut naunaittiaqtumik ahini hapkunani titiqqanit.



ATUQTAUYUMIK QAUYIHAUTINUT INIQTAGHAT

- ❑ Ihivriuqlugit tajja qanurilingayaaghait hunavaluit nunallaarni haamlatkullu kuapuriissaanit katitiqhutik naunaitkutanik.
- ❑ Aallatqiingnik qauyihautinik atuqlutik ilihimattiarimik naunaitkutatit katitiqhimayut. Qanuq ihumagiyauniaqqat taapkua qanurininganiit nunallaarnit havakviit, inugiangniit ingilraviit, nunat ihariagiyait hailiyauhimaayullu, manighiurniqmut havaaghat, avatinut amirnautit, inuuhiqattiarniqmut ihumaaluutit, qanuqlu.
- ❑ Katimaqatigilugit ilauyut naunaitkutanik katitiriyunik qauyihaiyuniklu ihuaqhaivalliayaamik tuniqhihimayaayaamiklu.
- ❑ Qauyihaglugu nunallaam ihuaqnighakkut havauhirnut ilittuqhinit.

Ihuaqnighakkut Parnaiyaiyut Havauhiq 4: Titiraqlugit Inirumayait, Ihuaqnighakkut Havauhighat, Havauhirniklu

Hivullit pingahuuyut havauhighat iniqtaugumik talvani ihuaqnighakkut parnaiyaiyut havauhiinit, hanahimaniaqtutit havakvingnit havakvighanik, naunaittiaqhimalugu Ihumagiyait, Havaaghatit, Ikpingnautillu, katitiqhimalutit qauyihaqhimaplugillu naunaitkutat haamlatkut tajja atuqtainik.

Ayurnavyaqtumik havaaghanik iniqhinnaqhiyuq ilittuqhariamik hivituyumi iniqtauyumayut, atuqhugit ihuaqnighakkut havauhighat, hiviiktullu havaaghat hivumuuqtittiyut haamlatkut kuapuriissaanit nunallaarniklu hivunighamut tautuktauyutut.

Hivituyumi iniqtauyumayut

Hivituyumi-iniqtauyumayut qauhittiarnaqtuq uqauhiq qanuq iniqhiyumayaqnik, maliguaqhuni Ihumagiyarnut, Havaaghanut, Ikpigiyannullu qanuqlu ilitturihimaliqtatit atuqtauyumik qauyihaiyunit. Iniqtauyumayut tallimanik ukiunik atuqtauvaktut aajjikkutaanik taapkua Ihuaqnighakkut Parnaiyautinik.

Taapkua Ihuaqnighakkut Parnaiyautit tallimanik 7-nikluuniit ukiunik hivituyumi iniqtauyughanik iniqtaghaqaqtut. Iniqtauyughanut naamayut taimaa ihumagilluariamik inirumayarnik aghuurnaqtut nunallaarnut ukiunit tallimanit atuqtughanit. Avatqukupata 7-nguyut iniqtauyughat, ahikkuuqpangniaqtutit ihuilutiqarlutik, iniqtailiplugit iniqtauyughat naammaktumik.

Taitai, iniqtauyumayut qauhittiarnaqtut, angiplutik, hivituyuuplutiklu pitquhiigut. Taapkuatut:



Icepick-kut ihuaqnighakkut havauhighait taimaittut:

- Titiraliqittiriamik haamlatkunnit.
- Aulattiaqtughanik ikluqpaghaliuqlutik amiriplugu avatiit.
- Ikayurahuqlugit hakugiktumik, aulattiaqtumik manighiurutinik.
- Nakuuniqhanik inuliyiyikkut ikayuutighaqaqlutik
- Munarilugit quviahuutigilugillu Inuit ilitquhiit pitquhiillu.

Ihuaqnighakkut Havauhiit

Ihuaqnighakkut havauhiit ilittuqhivaktut qanuq inirumayaagharnik iniqtaghanik kihimi ilitturittiarnaittut havautigiyaamik qauyihariamikluuniit.

Utiqhutik Icepick-kut ihuaqnighakkut inirumayainut, hapkua ilangi ikayuutauyut iniqhiyaamik:

Iniqtauyumayuq: Titiraliqittiriamik haamlatkunnit.

Ihuaqnighakkut havauhiit:

- Ihumagilluaqlugu angmaumaniq, ilitturittiarniq, kivgaqtuittiarniqlu havaaghaptinngit tamaat.
- Ayuqnaiqpaalliqlugu inungnut atuqtitauyaamik Haamlatkut naunaitkutainik ikayuutainiklu.
- Havattiaqlutik ikayuqtitut munarilugit Haamlatkut maniutait.
- Atuqtittighaarahaqlugit hivituyumi aulattiaqtut Haamlatkut ikayuutait.
- Parnaiyattiaqhimayumik parnaiyainiqmut havakvighaqaqlutik Nunallaat hivumuurutighait.

Hivikittumi iniqtauyughat havaaghat

Iharianaqtuq huli havaannguqtittiyaamik ihuaqnighakkut havauhighait iniqtaulaaqtunut havaaghanut atauhiqmi-malrunngiluuniit ukiunit. Aghuurnaqtutik, taapkuanguyut:

- Iniqhimayut qauyihaqtaulaaqhutiklu.
- Tuniyauvaktut kitumutkiaq inungmut havaariyaghaat.
- Iniqvighaanik upluunik tuniyauvaghutik.

Iniqtaghaungmata hivikittumi, himmiqtaulaaqtut ahinik havauhikkut taamna Ihuaqnighakkut Parnaiyautik ihivriuqtaugaangat. Iniqhimagumik qauyihaqtaulaarumiklu ilihimapkaivaktuq iniqhigaangat.

Atauhiq Icepick-kut ihuaqnighakkut havauhighalgit nakuuniqhakkut haamlatkunni titiraliqiyaaamik taimaatut *Ayuqnaiqpaalliqlugu nunallaarmiunut atuqtitauyaamik Haamlatkut naunaitkutainik ikayuutainiklu.*

Naunaittut, qauyihaiyut havauhiit taimailaaqtut:

Ihuaqnighakkut havauhiq: Ayuqnaiqpaalliqlugu nunallaarmiunut atuqtitauyaamik Haamlatkut naunaitkutainik ikayuutainiklu.

Havauhiit:

Iniriiqhilutik atauhiqmik tautuutiplutik katimavighanik taimaaluuniit qaritauyakkut inungnik naunaiqhivighaanik katimavighanik tatqiqhiutit tamaat ilittuqhitiyaamik nunallaarmiut Katimayitit havaanginnik kiuhiyaamiklu apiqhuutinik.

Hivuliqti: Tuhaqtittiyit

Aulapkaiyiryuangat

Upluq iniqvighaat: September 2022

Titiraqlugit katimatjutaita Katimayitit Haamlatkut qaritauyakkuurutainit malruk uplut naatinatit aniguqtitauvianit.

Hivuliqti: Qaritauyakkuurutinit titiraqti

Upluq iniqvighaat: Aulahimmaaqut



Atauhiqmik hivayaqtaghamik nappaanik tunihilutik nunallaarmiunut hivayaqtaghaat atuqtaghaallu Haamlatkut ikayutainik atuqtitauyaamik 6-mit uplaami 10-mut unnuktumi, Monday-mit Saturday-mut.

Hivuliqti: Haamlatkut titiraqtia

Upluq iniqvighaat: January 2023



INIQTAYUMAYUT, IHUAQNIGHAKKUT HAVAUHIIT, HAVAAGHALLU

- ❑ Titiraqlugit hivituyumi atuqtauyughat, angiyut iniqtauyughat Nunallaarnit, ihumagiplugit ihumaaluutit ihumaliuqhimayullu ilitturiyauhimagayut atuqtauyumi qauyihautinit.
- ❑ Ihuaqnighakkut havauhighaliuqlugit tamangnut iniqtauyughanut. Ihuaqnighakkut havauhighat kiutjutauyut apiqhuutinut “qanuq havauhiqarniaqqita iniqhiyaamik iniqtauyughanik?”
- ❑ Tamangnut ihuaqnighakkut havauhighanut, ilittuqhaqlugit kitukiat, qauyihaqhimayunik havaaghat iniqhiyaamik.

Ihuaqnighakkut Parnaiyaiyut Havauhiq 5: Titiraqlugit Atuqtittilugulu Ihuaqnighakkut Parnaiyautit

Tajjamut, titiraqhimaliqtutit katitiqhimaplutillu ihumaliuttiaqhimayunik ihumagiplugit qauyihaqtauhimayut. Kihimi katitauhimaittut huli atauhiqmut, parnaiyattiaqhimayut titiraq takupkaqtitalaqaqtuq ilaayunut. Ilaita atauttinnuraangat, tamangnik inuit taututtialiqpaktut qanuq iniqniaqhimayaagharnik ihumagiyatit.

Parnaiyaiyaamik Parnaiyautinik havaaghariyauvaktuq atauhiqmit inungmit titirauhiqattiaqtumik havaqatauvaktumiklu titiraqtuiyunik. Atauhiqmik titiraqtuqiamik ikayuutauyut taimaa titiraq tamaat atauhiqmik nipiqtiamik.

Hivulliq iniqtauyughaq parnaiyautik ihivriuttiaqtaghaat Katimayiit, Katimayiralaat, SAO/CAO-nguyut, tikkuaqtauhimayut havaktit, tikkuaqtauhimayullu ilaayut taimaa naatkutigiittiamik ilittuqhiyaamiklu qanurininganiinik havauhiit. Amigaittunik iniqtauyughanik parnaiyautighanik ihariaginiaqtut taamna kingulliqpaaq, angiqtauhimayut iniqtautinnagu.

Ilittuqhiitiyut Naunaitkutat taapkununga Ihuaqnighakkut Parnaiyautit

Atauhiqmik “ihuaqnighanik havauhiittuq” tutqighaiyaamik Haamlatkut Ihuaqnighakkut Parnaiyautainik. Kihimi, amihuuyut Ihuaqnighakkut Parnaiyautit Nunavunmi iliqahiutivaktut ilainnaanik tamainnikluuniit hapkuninnga atuqtaghainik.

1. Uqauhiqnik Miiyarnit Katimayinillu
 - Hughauyut taamna Ihuaqnighakkut Parnaiyautit
 - Naahurittiaqnaqtunik uqauhiqnik hivunighamut.
 - Quyagilugit ikayuqtiit ilaayullu.
2. Ihuaqnighakkut Havauhiqnut Tunngaviit.
 - Ihumagiyatit, Havaaghaq, Ikpinqnaqtullu.
3. Tajja Ihuaqnighakkut Havauhinut Qanurininganiit
 - Ihuaqnighakkut Parnaiyautit titiraqtut havauhiit.
 - Naunaitkutat tajja ihuaqnighakkut havauhirnut ilittuqhiitiinut.
 - Atannguyanit naunaitkutanik haamlatkut maningnut qanurininganianut.



4. Ihuaqnighakkut Havauhirnut Irinigiyaayut (Iniqtauyumayut)
 - Titiraqtauyut haamlatkunnit tallimanit-7-nut ukiunik hivituyunik ihuaqnighakkut havauhirnut iniqtauyumayut
 - Naittumik (atauhiinnaqmik titiraqviqarlutik) ilittuqhitinik tamangnut iniqtauyumayunik.
5. Ihuaqnighakkut Havauhighat Havaaghallu
 - Ihuaqnighakkut havauhighat ilitturiyauhmayut iniqhiyaamik tamangnik ihuaqnighakkut havauhirnut iniqtauyughat.
 - Iniqhimayut qauyihaqtaulaaqtullu havaaghat atayunik tamangnut ihuaqnighakkut havauhighanut, atauttikkullu tikkuaqhilutik havaktighanik iniqvighainiklu upluanik.
6. Munaqhiyut Qauyihaiyullu
 - Qanuq aulattiarninga taamna Ihuaqnighakkut Parnaiyautik munaqtauvangniaq qauyihaqtaulunilu.
 - Qanuq iniqpalliyut tuhaqtitauvangniat inungnut.

7. Uiguat (ilittuqhitikaffuit)
 - Haamlatkunni havakvingnut naunaitkutut
 - Naunaitkutut qauyihaqtunit qanurininganiit (taapkuatut HAAA-nik qauyihautinut naunaitkutut).
 - Ilihimalluaqtaghat talvanngat Ihuaqnighakkut Parnaiyautinit naunaittiaqhimayumik.
 - Hivayautinut naunaitkutait Miiyaayum, Katimayiit, havaktilluallu.

Titirauhiit Katitiriamik Ilihimalluaqtaghanik Ihuaqnighakkut Havauhighanut

Iniqhimalirumik inirumayatit, ihuaqnighakkut havauhiit, havaaghat, qauyihautillu aulattiarnianut titiraqhimaplugillu talvani Ihuaqnighakkut Parnaiyautinit, ikayuutauvaktuq naunaittiariamik naunaitkutanit takupkaqtitauhimayutut ataani. Naunaitkutut iliqahiutiyaulaaqut Uiguatut talvunga Ihuaqnighakkut Parnaiyautinut titiraqtauluniluuniit avaliittumik titiraqtitut atuqtaulaaqhuni taiguaqtaghatut inuit naunaiqhitiyauplutik katimaviinit.



	Iniqtauyumayut	Ihuaqnighakkut Havauhiit	U1	U2	U3	U4	U5	Qauyihautit inittiaqhimayunik
Munariyaghait	Iniqtauyumayuq 1 Amigaitqiyaulaaqtut iniqtauyumayut ilaayut tamangnut munariyaghanik.	Ihuaqnighakkut Havauhiq A Amigaitqiyaulaaqtut ihuaqnighakkut havauhighinik tamangnut iniqtauyumayunut	Havaaghaq 1					Havauhittiamik qauyihautighaqh- iuqtughat tamangnut ihuaqnighakkut havaaghanut.
			Havaaghaq 2					
			Havaaghaq 3	Havaaghat hivitulaaqtut atahiqmik amihunikluuniit ukiunik				
		Ihuaqnighakkut Havauhiq B						
	Iniqtauyumayuq 2 Amigaitqiyaulaaqtut iniqtauyumayut ilaayut tamangnut munariyaghanik.	Ihuaqnighakkut Havauhiq C	Amihut havaaghat ilaulaaqtut tamangnut ihuaqnighakkut havauhiqnut. Ilangi havaaghat aulahimmaalaaqtut					

	Iniqtauyumayut	Ihuaqnighakkut Havauhiit	U1	U2	U3	U4	U5	Qauyihautit inittiaqhimayunik	
Havaktighaliqiyit	Titiraqtittianik aulapkaiqarlutik haamlatkut aulapkaqtitainut ikayuutainullu	Ihivriuglugit nutaannguqtiqulugulu Havaqtiqhaligiqimut Parnaiyautit		Titiratqiklugu havaaghanut naunaitkutut					Havaaghanut naunaitkutut amihunut havaaghanut nutaannguqtiqhimayut
		Havaktighaqhiuglugit nutaamik SAO/CAO-mik titiraqtittilugit katitpaallimiqmut parnaiyautinik.	Naunaiqhitalutik SAO/CAO-mut havaaghanik						Nutaamik SAO/CAO-nguyuuq havaktiqaliktut
		Titiraqtittianik aulapkaiqarlutik haamlatkut aulapkaqtitainut ikayuutainullu		Tughiraqlutik naunaitkutanik haamlatkut akiliqtuivagainut ihivriughititnik		Ihumagilugit aallanngulaaqtut			Naunaitkutut tuniyauhimaliqtut haamlatkut akiliqtuivagainik ihivriughititnik
				Ihumagitqiklugit ihumaliurutaayut ikayuutauniaqtut havaktighaqhiuriamik pihimanahuaqhugillu havaktiit		Havaktiit takupkaiiunik ilaulutik angayughiit ilihavqianit			Amigaiqpalliyut uuktuqtut havaaghanut havaktitiiyullu havaaghaqhiuqtunik



Atuqtittivalliyut Parnaiyautinik

Taamna Ihuaqnighakkut Parnaiyautik aniguqtitaukpat Katimayinit, havaaghaq atuqtittiyaamik aullaqtiqpaqtuq. Qaffiuyut ihumagiyaghat hapkunani.

Havaktilluat ilauiyut titiraqtunit Ihuaqnighakkut Parnaiyautinik aghuurnaqtunik aulahimmaqtunik havaaghaqaqtut atuqtittivallianiqtumik. Hapkua havaaghat naunaiqhitiyauiyut kinguani naunaitkutanit.

IHUAQNIGHAKKUT PARNAIYAUTINIK ATUQTITTIVALLIAYUT HAVAAGHAIT	
Miiyauyuq Katimayiillu	<ul style="list-style-type: none"> • Munarilugit tuhaqtittilugillu iniqtauvalliyut. • Tuhaqtittilugit iniqtauvalliyut inungnut ilauiyunullu. • Quviahuutigilugu iniqhittiarniq.
SAO/CAO	<ul style="list-style-type: none"> • Titiraqpaqtut havaaghanut parnaiyautinik atuqtittivalliyaamik ihuaqnighakkut havauhiganik havaaghaniklu ilittuqhitihiyut talvani Ihuaqnighakkut Parnaiyautinit. • Havaaghanik aittuqhivaktuq havaktinut. • Naunaiqhitiyaktuq Katimayinut qanurininganiinut. • Aallannguqtiriquivaktut naunaiqhitiyaghat ihuaqnighakkut Parnaiyautinut, ihariagiyaukpat.
Havaktiit	<ul style="list-style-type: none"> • Havaaghaita inirahuaqlugit. • SAO/CAO-lu qauhitihiyalugit ihariagiyauyunik aallannguqtaghanik nutaannguqtiqtaghaniklu talvani Ihuaqnighakkut Parnaiyautinit.
Katimayiralaat / Havaktitauhimayut Katimayiit	<ul style="list-style-type: none"> • Makititaulaqtut ikkuaqtighat atuqtittivalliyaamik kitunikiyaq iniqtauyumayunit ihuaqnighakkullu havauhiqnit, ihumagiylugu havaaghaq havakvighaqlu.
Inuit / Ilauiyut	<ul style="list-style-type: none"> • Naunaiqhimaluhi. • Ihumangnik tuhaqtittiluhi Katimayinut. • Quviahuutigilugit aullatitpaqtut.

Ahiagullu, ilangi titiraat talvani Ihuaqnighakkut Parnaiyautinik atuqtitaulaqtut hanaplutik naunaittaqhimayunik, kitunuinnaq-titiraqhimayunik parnaiyautinik taapkua, taiguaqhimayutit hivuani, ittut ataagut taamna “qutangnaitjutit” talvanngat Ihuaqnighakkut Parnaiyautinit.

Atuqtaulluaqpaqtut ilittuqhitiyuyut hapkuninnga kitunuinnaq-titiraqhimayut parnaiyautit taapkuanguyut:

- Maniliqiniqmut Parnaiyautit
- Havaktighaliqiniqmut Parnaiyautit
- Angiyunut Nanminiqtut Parnaiyautit
- Nanminiqtut Munaqtit Parnaiyautit
- Nunallaarnit Nunanik Atuqtittiyut Parnaiyautit
- Irininaqtunut Kiuhiyut Parnaiyautit
- Ulapqipkaiyut Parnaiyautit
- Qulliqtuutinut Parnaiyautit
- ... ahiillu.



Tamangnik parnaiyautit atauttikkuuqtughat inirumayainut ihuaqnighakkullu havauhighanut titiraqhimayut talvani Ihuaqnighakkut Parnaiyautinit.

Tuhaqtittiyut Parnaiyautinik

Inuit tamangnik ikpiguhuutilgit Ihuaqnighakkut Parnaiyautinit – Katimayiit, haamlatkut havaktiit, ahiniqmiullu ilauyut – ilihimattiaqtughat qanuq ikpiguhuutiqarniat qanuriliuriaghainiklu ikayuriamik aulattiarniit. Naittukkut, taamna Ihuaqnighakkut Parnaiyautik *tuhaqtitauyughaq*.

Ihuaqnighakkut Parnaiyautit ilaupkailaaqtuq ilanganik – tamangnikluuniit – hapkuninnga havauhighanik:

- Hailiyauhimplugu taamna Ihuaqnighakkut Parnaiyautit ayuqnaittumik ihuaqtukkullu ayuqnaitpat (taapkuatut tuniqhaiplugit aajjikkutaliuqhimayut ik lumiutanut, takupkaiplugit Haamlatkut qaritauyakkuurutainit, takupqaqtittiquplugillu ilauyut timiqutait atatarutainut Parnaiyautinut inmingnik qaritauyakkuurutainit)
- Niruaqtauhimayut havaktiit haamlatkullu havaktiita takupkaivakkumik Parnaiyautinik katimayunit, PowerPoint-kut titiraqhimayunik takupkailutikluuniit, kiuhilutik apiqhuutinik, tuniqhailutiklu taiguaqtaghanik ilauyunut Parnaiyautinik naunaitkutanikluuniit Parnaiyautinit ilihimalluaqtaghanut.
- Quviahuutigiplugu aulattiaqhimayut iniqtauhimayullu havaaghat ilittuqhitiyimayut Parnaiyautinit tuhaqtittiyaghanik haamlatkut qaritauyakkuurutainit tuhaayaghanikluuniit aniguqtittiplutik tuhaqtitiyikkut.
- Ilittuqhitiqattaqhutik Katimayinik Katimayiralaaniklu katimagaangamik iniqtauvalliyunit Parnaiyautinit.

Tuhaqtitauyughat mighaagut Ihuaqnighakkut Parnaiyautit qauhittiarnaqtumik

parnaiyattiaqhimalutik, ihumaliuttiarnaqtuq titirariamik taapkuninnga *Ihuaqnighakkut Parnaiyautinut Tuhaqtittiniqmut Havauhiit*.



TITIRAQTUT ATUQTITTIYULLU HAVAAGHAIT

- ❑ Aittuqhilugu havaaghaq titirattiyuktumut inungmut titirahiqattiaqtumik.
- ❑ Ihivriuqlugit ilittuqhitiyut Ihuaqnighakkut Parnaiyautinik titiraqhimayut ahinit nunallaarnit taimaa aghurnaqtut unipkaaqtughat kihingguqtailiyaamik.
- ❑ Katimayiit, Katimayiralaat, SAO/CAO-nguyuuq, tikkuaqtauhimayut havaktiit, tikkuaqtauhimayullu ilauyut ihivriuqhivaktut iniqtauuyughanik Ihuaqnighakkut Parnaiyautinik iniqhiiplugu, aniqtauhimaliqqallu.
- ❑ Katitiqlugit ihumagilluaqtatit Parnaiyautinit naunaitkutatut ayuqnaiyariamik ilauyunut ilihimayaamik atatarutainik inirumayarnut, ihuaqnighakkut havauhighanut, havaaghanut, qauyihautinullu aulattiarniqmut.
- ❑ Havauhiqattiaqtumik, aulahimmaqtumiklu havauhiqaqlutik atuqtittivallianiqmut

Ihuaqnighakkut Parnaiyaiyut Havauhiq 6: Munarilugit Qauyihaglugillu Qanurininganiit

Taamna Ihuaqnighakkut Parnaiyautik nutaanngupalliyuuq titiraunik.



Qitqamiutat ikpiguhuutit iniqtauyumayullu aulahimmaaqhutik, ihuaqnighakkut havauhiit havaaghallu munaqtauvaktughat ihuaqhaqtaulutiklu utuqqannguqtailiplugit ihuaqtauyaamiklu.

Kitut Ihivriuqtauyughat Qauyihaqtauyughallu?

Ayuqnaittumik maliktaghatut, ihivriuqtaghariyatit havaaghatit qakugunnuraangat. Ihivriuqlugit taapkua havauhitit atuqtittivallianiqmut parnaiyautinit iniqtauvalliaaamik havakvighat ihumagiplugu ikayuutauyaaghailu iniqhiyaamik inirumayarnik piyumayarniklu. Ikayuutaunngitkumik, ihivriutqiklugit havaaghat/qauyihautighat titiraqhimayut Parnaiyautinit ihumaliurutigilugu taimaa ahiagut havauhikkut iniqhittiarutauniarumi.

Havaaghanut parnaiyautit atauttikkuurumi inirumayarnut piyumayarnullu, kihimi iniqhittiyuitkuvit huli, ihivriutqingniarungnaqhiyat inirumayaratit piyumayatillu. Ilaani, ihuilutaunngittuq qanuq talvunngariamik, kihimi qanuriliuqhutik ihuaqtumut tikittaamik. Apirilutik taimaa iniqtauyumayut ihuaqnighakkullu havauhighat titiratqiktauyariaghat.

Qakugunnuraangat qauyihaqtughavit?

Havauhittianguyuq ukiuq tamaat qauyihaiyaamik Ihuaqnighakkut Parnaiyautinik. Ukiuq tamaat ihuaqnighakkut parnaiyaiplutik havakvighatqiuuyuq ihivriuqhiyaamik taamnainnaunngittumik qanurininganiinik ihuaqnighakkut havauhighat havaaghallu talvani Ihuaqnighakkut Parnaiyautinit, kihimi tamangnik parnaiyautit qutangnaitjutiniittut. Hughayut iniqtauyughallu tamangnik parnaiyautinit ihivriuqtauyughat, ilagiingniillu unipkaaqtulutik. Ikayuutauniaqtuq Katimayinut ilihimattiariamik parnaiyainiqmut ayuqhautiqariaghat, ihumaliuriamiklu ahiagut parnaiyaqtariaghainik

iniqtauyumayunut haamlatkut Ihuaqnighakkut Parnaiyautinit.

Ihuaqtauniaqtuqlu ihivriuqhiyakkumik ihumagilluaqtainik Ihuaqnighakkut Parnaiyautinit hitamaiqlutik ukiumi – taapkuatut, maniliqiniqmut parnaiyainiqmut havauhiit – ingattauyuq aallannguqtarumik ikpingnautauplutik hivikittunnuami.

Ihuaqtauniarungnaqhiyuqlu ihivriuqhiyakkumik havauhiqnik ilanganik amigaitqiyaanik hitamaiqtuqtut ukiumi, ihumagiplugit hilataanit atuqtauyut ikpingnautauyut ikayuutinut, hulilukaaqtanillu taapkuatut niruaqtittiyunit hivuliqtiniklu himmiqtuigumik. Kihimi, munariinnarahaqtaulugit tamaat. Qauyihavallaaqpakkumik munaqtaghaqaqpallaaqpaktut ihuilutaulaaqhuni inungnut havaktunut.

SAO/CAO-nguyuq, ikayuqtaupluni havaktiinit, munaqtiuyughaq taimaa Katimayit naunaiqhitihimayaamik naunaitkutanik ihariagiyainik ihivriuqhiyaamik ihivriuqtaghanik.

Kina qauyihaiyughaq?

Nakuutqiyauyuq pingahuninngaqtuqarumi ilaunngittunik kitumutkiaq huliyaghanut, havaaghanut, ikayuutinulluuniit munaqtauyut qauyihaiyaamik havauhiinik. Nutqangayumik munaqtiqarumik ilumuqtumik “nutaaniklu iyyiqagtumik” ihuaqtukkut uqautjiniarungnaqhiyumik taimaalu/uniit ikayuqlutiklu. Inungnik ilaupkainiarungnaqhiyutit havaqatauyunik havaaghanut, havaagham tamatkiumania aulpaqtitauvaktuq atuqhugit ikayuutaita innum ilaunngittumik havaaghamut. Una inuk haamlatkut havakvianik havaktiuniarungnaqhiyuq havaktighaqhiuqlutikuunit hilataanit haamlatkut (taapkuatut unniqtuiyit, ahinik inungmik ahinit kavamatkunnit, ihumagiyauttiaqtumikluuniit nunallaarmiunik).



Ihuaqnighakkut Parnaiyaiyut Havauhiq 7: Ihumaliuqlutik Titiratqigiamik Nutaannguqtiqluguluuniit Parnaiyautit.

Uqaqhimayutut, Ihuaqnighakkut Parnaiyautit “atuqvighaqayuktut” taimaa tallimanik ukiunik. Hunavaluit aallanngulaaqtut taimaa hivituyumi, talvuuna ihumannaqtuq taimaa ihuaqhaiyariaqaqniat atuqvighaat taimaarumik. Ayuqnaittuq – taimaaluuniit piyaulaqtuq – ilangi iniqtauyumayut ihuaqnighakkullu havauhigat ilitturihimayait ihuaqutauniaqtut. Taimaitpat, hanaqitqingnaittut aullaqtiqvianit. Iniriiqhimayumik tunngaviqarniaqtutit hanahimmaaqvighat kinguanik Ihuaqnighakkut Parnaiyautit.

Kihimi, ilangi titiraqhimayut hunanut talvani Ihuaqnighakkut Parnaiyautinit naammannaqtutut itpat, aghuurnaqtuq aullaqtitqigiamik havauhiit parnaiyainiqmut havaaghanik inittiaqhimayunik hivuanit.

Titiraqhimayutut talvani Ihuaqnighakkut Parnaiyainiqmut Havauhiit 1, 2, taamnal 3: parnaiyailutik nutaannguqtiriamik Parnaiyautit; pulaatqiklugu Ihumagiyarnut, Havaagharnut, Ikipiyayunullu uqauhiit; atuqtauyuniklu qauyihaittiaqlutik. Upinngaqhiqnaqtuq qanuq hunavaluit aallannguqaktut – qaffiuyuniklu ihumaqhuliugat tughirautayut hivunighat qammaqpaalliriamik!

Ingilrutit Ikayuutighat Parnaiyaiyaamik

Amihuuyunik ukiunik, ihuaqnighakkut parnaiyainiq ihumagiyavaktuq iharianaqtutut havauhiqtut timiqutinut aallatqiingnik. Talvuuna, upinngaqhiqnaittughaq taimaa amihuuyut ingilrutit havauhiillu hanayauhmayut aularaaqtillugit ikayuutighat parnaiyainiqmut. Hama ilangi qaffiuyut aturumanaqtatit.

Ihumaqhuliuqtut

Ihumaqhuliriamik havauhiuyuq taimaa tamangnik ihumaqhuliuqtauyut tuhaqtauyaamik ihumagiyauyaamiklu. Ihumaqhuliriamik katimayut hivuliqtiqaqpaktut ilihaqhimayumik uqaqtimik atuqpaktumik qakuqtamik titiraqvingmik, titirauyaqvingnit makpiqtaqtut, angiyunikluuniit titiraaghanik nivinngaqhimayut ikluaqmi titiraqvighanik ihumaqhuliugaqnik. Ilauyut tunihitaaraangata ihumaqhuliugainik, taamna katimapkaiyuq ikkuaqtuqpagaik katimayut havauhikkut aviktuqhugit irininaqtullu ihumaliuqhugit. Irininaqtunut ihumaliukkat tunngavinnguqaktut inirumayainut ihuaqnighakkullu havauhirnut aullaqtiqviiyut ihuaqnighakkut parnaiyainiqmut.

Katimapkaittiaqaktut taimaa amirnaittumi aghuurnaqtumilu havakviqaqhutik, ihuilutaittumik, talvani tamangnik ilauyut havaktitauyaamik ikayuqhutik. Ihumaqhuliriamik hanauyaqtutut hanatuyutullu ihumaqhuliurnaqtuq, atauttikullu ikayuqhugit ilauyut katitpalliayaamik inirumayaat ihumagiplugu.

Ihumaliugaqnut Naunaitkutat

Ihumaliugaqnut naunaitkutut havakvingnit ingilrutauyuq taimaa katimayunut ilauyut aallatqiingnik amigaittuniklu ihumaqhuliriamik aviktuqlugillu pitquhiinut avvaqnut. Una ingilrutik ihumaqhuliriamik hivumuqtittivaktuq naunaiqhitiplugit aviktuqhugit. Havaqatigiit ihumagittiaqtaghait avighimayut ilagiikkumik piyumayainullu iniqtaghainut. Iiitturittiaqnaqtut qanuq aturiamik ihumaliugaqnut naunaitkutut talvaniittut *Uiguuq 1-mi*.

Avatinik Ihivriuhiyut

Avatinik Ihivriuhiyut aulahimmaaqtumik munaqhivaktut ingilratjuhiqnik atuqtauyuniklu timiqutim iluani hilataanilu avatiit aghuurnaqtut aulattiriamik. Avatinik ihivriuhiyut



atauttikkuuyuktut taapkuulu HAHA-nut qauyihautinik (titiraqhimayut ataani).

Havakvium Iluani Qauyihautit

ikayuutauyut naatittiyaamik timiqutivit tatta aulapkaiyait havaaghaillu ikayuutighatIT ihumaliuttiariamik piyumayarnik qanurittuniklu ikayuutiqariamik tatta kitunullu ikayuutauvat. Kinauvat ilauyut? Hunanik ihariattivat? Haamlatkut ikayuttiaqhimavait hivuanit? Taimaitpat, qanuq hanavigihimmaaqniaqqat? Taimainngitpat, qanuq ihuaqhaivaalliqliaqqat? Qanuq ihumayut?

Havakvium Hilataanit Qauyihautit

ikayuutauyut ilittuqhariamik ilauyunik. Hunat aghuurnaqqat tamangnut ilauyunut? Haamlatkut ikayuqtiuvak ihariagiyainut? Qanuq ikayuqhimavakpat piniaqturihimayainik ikayuutigut? Kitut kavamatkut havaaghaigut maliktughauyugut? Qanuq ikayuqpangniaqqigut niuviqtit ihariagiyainut avatqutailiplugit manikkut, maligaliqiyit malighugit, kavamatkullu ahikkuuqtailiplugit.

Avatiliqiniqmut Ihivriuhuyut Titiraaghait iliqahiutihimayut *Uiguag 2-mi*.

HAHA-nut Qauyihautit

Ahiagullu ingilrutiuyut ihariagiyauyut atuqtittiyaamik Ihuaqnighakkut Parnaiyautinik taamnauyut HAHA-nut qauyihautit. HAHA-nut qauyihautinit, havakvium iluani hilataanilu qauyihavaktut tautughugit timiqutivit **Hakugingniit, Ayuqhautait, Havaaghat Amirnautilu:**

- Hakugingniit nakuuyut pitquhiuyut nunallaarnit tatta ikayuutauyut Havaaghainik iniqhiyaamik.
- Ayuqhautit taapkuanguyut haamlatkut ihuaqhaqtaghariyait Havaaghaita iniriamik.

- Havaaghat naahuriyauyut ingilratjuhiit hulilukaaqviillu nunallaarnit nakuruttiqtauvighaat hivunighami iniqhiyaamik Havaaghainik.
- Amirnautilu naahuriyauyut ingilratjuhiit hulilukaaqviillu amirnaqhilaagtut nunallaarnit iniqhiyaamik Havaaghainik.

Hakugingniit Ayuqhautillu *ilumiutauyut* nunallaarnit. Havaaghat Amirnautilu *hilataaniittut* nunallaarnit.

Naunaitkut qanuq HAHA-nik ihivriuhuyut talvaniittuq *Uiguag 3-mi*.

Irininaqtunik parnaiyaiyut

Ilvit havaqatitillu ihumaqhuliuqtatit aviktuqtaghatit aghuurnaqqigut, hivituniagut, atuqpauhiillu iniqtauyumayunut. Atuqpauhiit Aviktuiniqmik Pitquyahimayunik havauhiulluakpaktuq ilauyunut ikayuutauyut ihumaliuqtaghanik angiqhiyaamik aghuurnatqiyauyut piyumayainik iniqhiyaamik. Aviktuqhugit irininaqtukkut atuqhutik kitunikiaq uqauhullanik (taapkuatut “maliguattiatqiyauyut Ihumagiyaptingnut Havaaghaptingnullu”, “akikitqiyat”, “inuuhiqattiarniqmik hivumuuqtittiyut”, qanuqlu) taimaa inuit tamaita tautugumaaqtait ihumaqhuliuqat atautikkut ihumaqaqlutik – taimaalu angiqatigiikpaghutik.





QANUQ TITIRAQTUIYAAMIK IHUAQNIGHAKKUT PARNAIYAUTINIK INGMINGNUT-QAUYIHAUTIT

1. Kituuva pitquyauhimayuq hivulliqpaaq havauhighaq talvani Ihuaqnighakkut Parnaiyautinik titiraqtunik?
✓ Ihivriuriamik, takulugu *makpiraq 10*.
2. Hunauyuq aallatqiingniit akunnngani taapkua haamlatkut *Ihumagiyainik* taapkualu *Havaaghainik*?
✓ Ihivriuriamik, takulugu *makpiraq 11-12*.
3. Huuq atuqtauvakpa *Atuqtauyunik Qauyihautit*?
✓ Ihivriuriamik, takulugu *makpiraq 13*.
4. Huuq aghuurnaqqaa Havaaghat iniqtauyaamik qauyihagtauyaamiklu?
✓ Ihivriuriamik, takulugu *makpiraq 21-22*.
5. Kitut havauhiuvat atuqtaulaaqtut ilittuqhitiyaamik Ihuaqnighakkut Parnaiyautinik nunallaarnut?
✓ Ihivriuriamik, takulugu *makpiraq 21*.

Qaritauyakuurutinit Naunaiqhiviit

Ilittuqhitaaffuuyut haamlatkut ihuaqnighakkut parnaiyautinik ikayuutaulaaqtut parnaiyainiqmut havaaghanut, hapkua pivighat ihivriuqlugit.

Iqaluit Ihuaqnighakkut Parnaiyautit 2017-2022

https://www.iqaluit.ca/sites/default/files/english_5year.pdf

Nunagiyauyuq Yellowknife-mit Nunallaarmiut-Ihumagiplugit Ihuaqnighakkut Parnaiyautit 2010

https://www.yellowknife.ca/en/city-government/resources/Reports/Economic_Development/City_of_Yellowknife_Community_Based_Strategic_Plan_2010.pdf

Nunagiyauyuq Yellowknife-mit Iniqtauyumayut Piyumayuyullu 2019-2022

https://www.yellowknife.ca/en/city-government/resources/City_Council_and_Mayor/Councils_Goals_Objectives/STRATEGIC-PRIORITIES-2019-2022-ACTION-PLAN.pdf

Nunallaaq Hay River, Nunattiami, Ihuaqnighakkut Parnaiyautit 2019-2023

<https://hayriver.com/wp-content/uploads/2019/07/Hay-River-Strategic-Plan-2019-2023.pdf>

Nunallaaq Inuvik, Nunattiami, Ihuaqnighakkut Parnaiyautit 2016-2021

<https://www.inuvik.ca/en/town-hall/resources/Town-of-Inuvik-2016-2021-Strategic-Plan.pdf>

Nunallaaq Fort Smith, Nunattiami, Ihuaqnighakkut Parnaiyautit 2018

<https://www.fortsmith.ca/sites/default/files/E.%20Fort%20Smith%20Strategic%20Plan.pdf>



TAIMAAQTIRUTIT

Aghuurnatqiyauyuq havauhiq ihuaqnighakkut parnaiyainiqmut taimaa *aulaqtiriamik!* Ayuinniqhaunngitkaluaqlutik ihuaqnighakkut parnaiyainiqmut kihimi, ilihimalutik taimaa, qauhimaliqniaqtutit ilihimayaghaniklu ayuiqlutit qakugunnuaq *ilvit* ikpigiyaulutit ihuaqnighakkut parnaiyainiqmut ikayuqtiulutik pivighaulutiklu.

Amigaiqpalliapluni, ihuaqnighakkut parnaiyainiq takuyauvaktuq nunallaarmiunit iharianaqtutut haamlatkut kavamautainit hivunighaq nakuuhivaalliriamik inungnut, ilagiingnut, nunallaaqmullu. Talvuuna amihuuyut inuit ikayurumayut havauhiqnut ilittuqhitiplutik atuqtainik, ihumaqhuliuqhugit ihuaqhautighat, ikayuqhutiklu ilittuqhainiqmik inirumayainik, ihuaqnighakkut havauhiqnik, havaaghaniklu ihuaqtumik aallannguqtiurutighanik.

Iniqtaulluarumayuq titiraqtuiyunik atuqtittiyuniklu Ihuaqnighakkut Parnaiyautinik taimaa nunallaavit ihariagiyait hivunighamilu ihumagiyauyut iniqtauyaamnik ihuaqtukkut, naatkutigiiklutiklu. Atuqtauyut aallannguqpalliagumik, havauhiigut aulahimmaaqtumik nutaannguqtirivaktuq.

Havaqatauplutit parnaiyaiyunut pivighanullu, ilvit, Katimaqatiillu, ilauyullu nunallaarnit havaghimmaaqpaktut taimaa uplumi Ihumagiyauyut akagu pinnguqtitaugiamik.

Qaffiuyut Kingulliqaat Taimaaqtiqvianit Ihumagiyaghat

Ilaupkailugit ilauyut

Angmaumayaamik ilaupkaiyaamiklu ihuaqnighakkut parnaiyaiyut havauhiinut aghuurnaqtuq aulattiarimik.

Naahurittiaqpakluhi, kihimi ihumagittiaqlugit.

Ihumaqhuliuqlutik ayuqnaqtunik iniqhiyumayaqaruvit – kihimi ihumagittiaqlugit.

Ikayuqtighaqhiuqlutik iharianaqqat.

Atauhiq nakuutqiyauyuq nunallaam avatiinik taapkua nunagiyauyut ilittuqhitiwangniaqtut amihunik naunaitkutainik. Nunallaarmik nakuuyumik ihuaqnighakkut parnaiyautiqarumik takunniruvit, kamahughimaittumik apuqlugit ayuiqvigilugillu huliyaainit.

Iharianaqqat, aallannguqtirivaklutik.

Kamahughimaittumik aallannguqtirivaklutik Ihuaqnighakkut Parnaiyautinik iharianaqqat. Hunakiaq aulattianngitkumi, ihuaqhaqlugu, ahikkuuqtailiplugit ihumagiyait.

Ihuaqnighakkut Parnaiyautit ighinnaqtailugu iliqpingnit.

Titiraqhimalirungni Ihuaqnighakkut Parnaiyautit, ighinnaqtailugu hanikuniktaililugu. Uumayutut ihumagilugu tuhaqtittiplugu ilauyunut, ihivriuhugit iniqpalliyut qakugunnuraangat, quviahuutigiplugillu inittiaqhimayut.



UIGUAT

1. Ihumaliugaqnut Naunaitkutanut Havauhiit

Ihumaliugaqnut Naunaitkutatat timiqutinit ingilrutauyuq taimaa ilauyut ihumaqhuliuqtunit ihumaqhuliuriamik amihunik aallatqiingnik uuktuqtaghanik parnaiyailugillu pitquhiinut avvaqnut.

Hanayaamik Ihumaliugaqnut Naunaitkutanik, nipitirutilingnik titiraaghaqaqlutik nivinngavighamiklu nipitiquvighaanik. Katimayunit hivuliqti (taamnatut Uqaqtiuyuq) apiqhuiyuq ilittuqhitiyuqluuniit atuqtauyumik ihariattiyunik ihuaqhautighanik kinguani ilauquiplugit katimayut ihumaqhuliuriamik. Ilauyut titiraquyauyut ihumaqhuliugainik, nuutittilugit tamangnik ihumaqhuliugat atuqhutik uqauhiqluanut uqauhiqnullu talvani Nipitirutilingnik titiraaghainit. Maliktaghaq taamna: atauhiqmik titiraaghaqaqlutik ihumaqhuliugainut.

Kinguani ilauyut – tamangnik atauttikut – nipitiqulugit titiraangit ikluam haanganut.

Havaqatigiiqulugit nipitiriqlutik. Tautughutik ahiit titiraanginnik apiqhuiqlutiklu ahiagut ihumaqhuliurnaqtuq.

Talvanngat, apirilugit tamangnik ilauyut ihivriuqhiyaamik ihumaqhuliugaqnik aviktuqlugillu avvaqnut. Taapkuatut, qaffiuyut ihumaqhuliugat ilaupkaigumik tubaqtittiniqmik qanukiaq, atauttimut katitauniaqtut. Havaaghat hapkua inirumik, illitturiniaqtutit taimaa 10-nik amihunikluuniit katiqhugaqaqniaqtutit.

Kinguani, unipkaaqlugit katimayut katiqhugainik, attiqulugu, naittumik naunaitkuhiqlugit pitquhiit.

Kingulliqaami, aviktuqlugit katiqhugat aghurnaqaqniigut. Ayuqnaittuq avikturiamik irininiigut taimaa tamangnik ilauyut tunilugit ivitaalingnik nipitirutilingnik apirilugit tamangnik iliurayaamik nipitirutilgit talvunga tallimanut katiqhuganut ihumagiyainnik aghurnaqtutut (tamangnik ilauyut atauhiinnaqmik iliurailaaqtut tikkuqaqhimayainut). Taimaaqpat havaangit, ilangi katiqhugat amigaittunik nipitirutiqaqniat – ilittuqhitiyuq angiqhimayunik aghurnaqaqniinut – ilangittauq ikittunik nipitirutiqaqniat. Havauhighat ilittuqhitiyauyut kinguani:

Havauhiq 1: *Apiqhuitik apiqhuutunik ilittuqhitiyluhiluuniit atuqtauyumik ihumaqhuliuqlugu. Titiraqtittilugit ilauyut ihumaqhuliugainik atuqhutik uqauhilluanik uqauhiqniklu talvani Nipitirutilingnik titiraaghanit nipitiqulugit ikluam haangani.*

Apiqhuutik/Atuqtauyuq

Ihumaliuqhimayuq 1

Ihumaliuqhimayuq 2

Ihumaliuqhimayuq 5

Ihumaliuqhimayuq 6


Ihumaliuqhimayuq 3

Ihumaliuqhimayuq 4


Ihumaliuqhimayuq 7




Havauhiq 2: *Aviktuqlugit ihumaqhuliugat aajjikkutariingnut avvaqnut.*



Havauhiq 3: *Angiqhimaluhi ihumaliuriamik atighaanut naunaitkutanullu tamangnut katitauhimayunut, avighimayut tamangnik ilitturittiaqnaqlugit. Atauttimuklugit tamaita katiqhugat. Iniqhimayuq taimaa ittughaq:*



Havauhiq 4: *Katiqhugat ihumaliuqlugit aghuurnighaigut taimaa ilauyut ivitaalingnik nipitiqulugit katiqhugaqnut aghuurnatqiyaunahugiyainut. Iniqhimayuq taimaa ittughaq:*



Taapkua tamangnik ilauyut takuinnarianikkamik qanuq ihumaqhuliugait ikayuutauvaktut taimaaqtiqvianut, taamna Ihumaliugaqnut Naunaitkutaq ikayuutauyuq katimayinut ihumagittiarimik, atauttimik iniqhinahuaqhutik, iniqniaqhimalugit inirumayaita.



2. Avatinik Ihivriughiyut Titiraaghat

Avatinik Ihivriughiyut: Havakvium Iluani

Ihumaaluutit aulayuittut *iluani* nunallaavit.

1. _____
2. _____
3. _____
4. _____
5. _____
6. _____
7. _____
8. _____
9. _____
10. _____

Avatinik Ihivriughiyut: Ilumiutat

Ihumaaluutit aulayuittut *hilataanit* nunallaavit.

1. _____
2. _____
3. _____
4. _____
5. _____
6. _____
7. _____
8. _____
9. _____
10. _____



3. HAAH-nut Qauyihautinut Titiraaghat

HAHA-nut qauyihautinit, havakvium iluani hilataanilu qauyihavaktut tautughugit timiqutivit **Hakugingniit**, Ayuqhautait, **Havaaghat Amirnautilu**. HAAH-nut Qauyihautit ihumagiyaayughanik ilittuqhitivaktuq qanurininganiinut kitukiat havaaghat taimaalu unipkaaqtittilaaghuni havauhighanik.

Kitut ihumagiyaavaktut hakugingniqtut ayuqhautitullu?

Hakugingniit piqutaayut ayuitalluuniit ikayuutaulaaqtut nunallaarnut iniqhiyaamik ihumagiyaainik. Taapkuatut, havaktighat ihumagiyaaulaaqtut hakugingniqtut.

Ayuqhautit piqutinut ayuitanullu ihuilutauyut kinguvaqtittivaktut iniqhiyaamik ihumagiyaainik, taapkuatut ihuilutilgit tuhaqtittiviit.


Hunaayut havaaghat amirnautilu?

Havaahat taapkuanguyut atuqtauyut nakuuyumik ikpingnautiqaqtuq timiqutinut. Kavamatuqanit manighautit ikayuutillu ihumagiyaaulaaqtut havaaghatut.

Amirnautilit aallanngayut havaaghanit. Hunaqutilgit ihuilutaulaaqtunik nunallaarnit kavamanut.

Naunaitkutaq ataani ikkuaqtuutighaq qanurittunik apiqhuutinik aullaqtirutaavaktut unipkaaqtunik HAAH-nik.

Ilumiutat Ihumagiyaaghat	
<p>Apiqhuutit hakugingniit mighaagut:</p> <ul style="list-style-type: none"> • Hunaayut nunagiyaayum ihuaqutait? • Qanuriliuqpakpat nunagiyaayuyuk nakuuyumik? • Qanurittunik ihuaqutaayunik pivighaqaqqa nunagiyaayumi? • Hunanik aallat inuit tautukpakpat hakugingniqtut nunagiyaayumi? 	<p>Apiqhuutit ayuqhautit mighaagut:</p> <ul style="list-style-type: none"> • Qanuriliuqpakpat pittiaqhimaattumik? • Humik ihuaqhivaalliaqnaqqit? • Humik atuqtailiyughauvit?
Hilataanit Ihumagiyaaghat	
<p>Apiqhuutit havaaghat mighaagut:</p> <ul style="list-style-type: none"> • Kituuvat nakuuyut uukuqtuqtaghat hivungni? • Kituuvat tajja ingilratjutaayut ilihimayatit (aallannguqtiriyut kavamatkut maligaghaliuqhimayainit, inuuhiqattiarniqmut atuqtauyut, inugiangniit, pitquhiit, manighiurniq, qanuqlu). 	<p>Apiqhuutit amirnautilit mighaagut:</p> <ul style="list-style-type: none"> • Kitut ayuqhautit naahurivigit? • Amirnautiqaqqa hakugingnianut nunagiyaayuyuk hila aallannguqpalliyumi? • Qanuriliuqtut avatingnit, ahinilu nunagiyaayunit? • Qanuq manighiurutit aallanguqpalliyavat? • Angiyut havakviuyut amiqhiyughauvat? • Qanuq nunaqyuami nunaptingnilu maligaghaliuqtit avatiit maligaliuqtilluuniit atuqtait aallanguqpalliyavat? • Qanuq inugiangniit aallannguqpalliyava?



4. Ihumagiyauyut, Havaaghat, Ikpigiyauyunullu Titiraaghat

Ihumagiyauyuq (naniittumavita hivunighami?)

Havaaghaq (huuq hamaniittugut)

Ikpigiyauyut (kitut aghurnaqtut uvaptingnut?)

1. _____
2. _____
3. _____
4. _____
5. _____
6. _____
7. _____
8. _____



5. Havaaghanik Parnaiyaiyut Titiraaghait

Havaaghanut Parnaiyautit: Tikitpalliyut Hamanngat Talvunga

Qakugu inirumayaptigit hapkua? _____

Kitut ilaupkaqtitauyughat? _____

Qanuq naahuriyauyut akighait? _____

Ayuqhautiqarniaqqa? Taimaitpat, qanuq ihuaqhainiaqqigit? _____

Ikpingnautiqaqqa ahinut havakvingnut, hunaqutinut aulapkaqtainullu? Angiqpat, qanuq? _____



Qanuq hapkua ikpingnautaniaqqat niuviqtinut ilaayunullu? _____

Aulapkaiyiryuanit angiqtauhimavat? _____

Havaaghanut parnaiyautit ihuaqqata maligaliqiyit havauhiigut? _____

Una hanaqiyauyughaq parnaiyautailu ikayuutavat ihumagiyaptingnut ikpigiyaptingnullu? _____





© Hamalatkunni Ayuiqhanikhakkut Timingat, 2021